




Broj: 05-02-1-54/18
Sarajevo, 16.2.2017. godine

PARLAMENTARNA SKUPŠTINA BiH

- Zastupnički dom -
- Dom naroda -

SARAJEVO

 BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 19.02.18			
Organizaciona jedinica	Klasifikaciona oznaka	Redni broj	Broj priloga
01/02-02-1-54/18			

PREDMET: Prijedlog zakona o dopunama Zakona
o prekršajima, *dostavlja se*

Vijeće ministara Bosne i Hercegovine, na 130. sjednici održanoj 18.1.2018. godine, utvrdilo je Prijedlog zakona o dopunama Zakona o prekršajima, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po temeljnom zakonodavnom postupku.

U svezi s navedenim, u privitku dostavljamo Prijedlog zakona o dopunama Zakona o prekršajima, na bosanskom, hrvatskom i srpskom jeziku. Istodobno dostavljamo Pregled odredbi Zakona koje se dopunjavaju, pribavljena mišljenja nadležnih institucija, neslužbenu verziju prečišćenog teksta Zakona o prekršajima, kao i elektronsku verziju Prijedloga zakona.

S poštovanjem,


v.d. GENERALNI TAJNIK
Robert Vidović

БОСНА И ХЕРЦЕГОВИНА
САВЈЕТ МИНИСТАРА

ПРИЈЕДЛОГ

ЗАКОН
О ДОПУНАМА ЗАКОНА О ПРЕКРШАЈИМА

Сарајево, фебруар 2018. године

На основу члана IV 4. тачка а) Устава Босне и Херцеговине, Парламентарна скупштина Босне и Херцеговине, на сједници Представничког дома, одржаној 2018. године, и на сједници Дома народа, одржаној2018. године, усвојила је

ЗАКОН О ДОПУНАМА ЗАКОНА О ПРЕКРШАЈИМА

Члан 1.

У Закону о прекршајима ("Службени гласник БиХ", бр. 41/07, 18/12, 36/14 и 81/15), у члану 2. став (5) тачка се замјењује зарезом и додају ријечи: „осим ако је кажњавање за покушај изричито прописано.“

Иза става (5) додаје се став (6) који гласи:

„(6) Одредбе овог закона примјењују се на сва лица без дискриминације по било ком основу, у складу са Законом о забрани дискриминације“.

Члан 2.

У члану 29. став (3) иза ријечи: „радних дана“ додају се ријечи: „ако се уручење врши у Босни и Херцеговини и 10 радних дана ако се уручење врши ван територије Босне и Херцеговине,“.

Члан 3.

У члану 33. у првој реченици иза ријечи: „новчану казну“ додају се ријечи: „и трошкове платног промета“.

Члан 4.

У члану 37. иза става (2) додаје се нови став (3) који гласи:

„(3) Суд који прими захтјев за покретање прекршајног поступка ће, у складу с чланом 34. овог закона, тај податак у електронској форми унијети у прекршајну евиденцију.“

Досадашњи ст. (3), (4) и (5) постају ст. (4), (5) и (6).

Иза става (5) који постаје став (6) додаје се став (7) који гласи:

(7) Овлашћени органи из члана 3. став (1) тачка а) овог закона могу водити властиту прекршајну евиденцију, а сами прописују садржај и начин вођења те евиденције, у складу овог Закона и Закона о заштити личних података ("Службени гласник БиХ", бр. 49/06, 76/11 и 89/11).

Члан 5.

У члану 44. иза става (2) додаје се став (3) који гласи:

„(3) Изузетно од става (1) овог члана, новчане казне и средства прибављена продајом одузетих предмета за прекршаје који су прописани Законом о основама безбједности саобраћаја на путевима у Босни и Херцеговини и другим прописима из области безбједности саобраћаја на путевима, приход су буџета оног нивоа власти из којег се финансира овлашћени орган који у оквиру своје надлежности обезбјеђује њихово спровођење.

Члан 6.

Овај закон ступа на снагу осмог дана од дана објављивања у "Службеном гласнику БиХ".

ПСБиХ број ____/18

_____ 2018. године

С а р а ј е в о

ПРЕДСЈЕДАВАЈУЋИ

Представничког дома

Парламентарне скупштине БиХ

ПРЕДСЈЕДАВАЈУЋИ

Дома народа

Парламентарне скупштине БиХ

ОБРАЗЛОЖЕЊЕ

I – УСТАВНИ ОСНОВ

Уставни основ за доношење Закона о допуни Закона о прекршајима садржан је у члану IV 4. а) Устава Босне и Херцеговине, према којем је Парламентарна скупштина Босне и Херцеговине надлежна за доношење закона који су потребни за спровођење одлука Предсједништва Босне и Херцеговине или за вршење дужности Скупштине Босне и Херцеговине по Уставу.

II – ПРИНЦИПИ

- Усаглашавање закона на нивоу БиХ – Закон о основама безбједности саобраћаја на путевима у Босни и Херцеговини ("Службени гласник БиХ", бр. 6/06, 75/06, 44/07, 84/09, 48/10, 18/13 и 8/17), је усвојен 2006. године и члан 240. овог закона до данас није мијењан. Цитирани члан прописује да „Сви приходи настали примјеном овог закона припадају надлежним органима, у складу с чланом 2. овог закона. “Закон о прекршајима усвојен је 2007. године и у члану 44. у ставу (1) који није мијењан прописано је да „Новчане казне и средства прибављена продајом одузетих предмета за прекршаје који су прописани законима и другим прописима Босне и Херцеговине, приход су Буџета Босне и Херцеговине,...“. Дакле, овај закон, који је касније усвојен није цијенио одредбе *lex specialis* закона које другачије регулишу одређено питање. На мањкавост члана 44. из текста Закона од 2007. године указала је и Управа за индиректно опорезивање, па је овај члан допуњен 2012. године, те се исти не примјењује на Управу за индиректно опорезивање ("Службени гласник БиХ", 18/12“).

- Правна сигурност и једнакост у поступању – овим законом нити се могу мијењати нити мијењају постулати утврђени у другим законима, али само јасни и усаглашени закони могу свим грађанима обезбиједити једнак приступ правди.

- Ефективност – правилна примјена закона који нису контрадикторни убрзаће њихово спровођење од овлашћених органа Босне и Херцеговине, ентитета или кантона (полицијски орган, инспекцијски орган, судови), у чију надлежност спада директно или индиректно спровођење ових закона.

Дакле, приликом израде закона руководило се принципом неопходности, измјене су сведене на отклањање уочених недостатака, како у самим прописима тако и посљедицама које су настале њиховом примјеном. Принцип ефективности је такође узет у обзир јер је закон у потпуности примјењив и њиме се рјешавају конкретни проблеми на које је указано Извјештајем о финансијској ревизији Министарства правде Босне и Херцеговине за 2013. годину и 2014. годину, али и анализама које је сачинило Министарство правде и путем Информација информисало Савјет министара Босне и Херцеговине. Принцип конзистентности је такође узет у обзир, с обзиром на то да су предвиђене измјене закона конзистентне са Законом о основама безбједности саобраћаја на путевима у Босни и Херцеговини који је раније усвојен.

III – РАЗЛОЗИ ЗА ДОНОШЕЊЕ ЗАКОНА

На овај проблем скренута је пажња Министарству правде Босне и Херцеговине у извјештајима о финансијској ревизији Министарства правде Босне и Херцеговине за 2013. годину и 2014. годину, у којима се овом министарству препоручује да у сарадњи с институцијама које су укључене у процес наплате прихода од новчаних казни ријеши питање евидентирања наплаћених новчаних казни, те уз ангажовање релевантних институција настави активности на обезбјеђењу услова за праћење наплате новчаних казни код издаваоца прекршајног налога.

Савјет министара Босне и Херцеговине, на 78. сједници одржаној 24. 10. 2016. године, размотрио је и усвојио Информацију о проблемима у вези с примјеном Закона о прекршајима у Босни и Херцеговини, те прихватио став Министарства правде Босне и Херцеговине да до различите примјене одредби о припадности прихода од новчаних казни за прекршаје долази због неусклађености закона које примјењују овлашћени органи и судови приликом изрицања прекршајних санкција.

Разлог оваквог поступања, односно непримјењивања члана 44. Закона о прекршајима Босне и Херцеговине од овлашћених органа ентитета, кантона и Брчко дистрикта, је што прописи на ентитетским нивоима и нивоу Брчко дистрикта БиХ дефинишу припадност јавних прихода, па тиме и новчаних казни од прекршаја на сљедећи начин:

- Закон о измјенама и допунама Закона о прекршајима Републике Српске („Службени гласник РС“, број 110/16) у члану 107а. (Приходи Буџета Републике Српске) прописује да су новчане казне за прекршаје приходи Буџета Републике Српске, односно буџета јединица локалне самоуправе, а Закон о буџетском систему Републике Српске („Службени гласник РС“, бр. 121/2012, 52/2014, 103/2015 и 15/2016) у члану 8. прописује да су приходи Буџета Републике Српске новчане казне, изузев казни утврђених актима града односно општине.

- Закон о прекршајима Федерације БиХ („Службене новине Федерације БиХ“, број: 63/14) не садржи изричито одредбу којом се дефинише припадност прихода Буџету Федерације БиХ, кад су у питању новчане казне за прекршаје, али је Законом о припадности јавних прихода у Федерацији БиХ („Службене новине Федерације БиХ“, бр. 22/06, 22/09) у члану 4. тачка д) (Припадност јавних прихода Федерацији) прописано да Федерацији припадају „новчане и друге казне у складу с федералним прописима“. Чланом 10. тачка д) прописано је учешће кантона у осталим јавним приходима, међу које спадају и новчане и друге казне у складу с кантоналним прописима.

- Закон о прекршајима Брчко дистрикта Босне и Херцеговине („Службени гласник БД БиХ, бр. 24/07, 6/12 и 11/12) не садржи изричито одредбу којом се дефинише припадност прихода Буџету Брчко дистрикта БиХ, кад су у питању новчане казне од прекршаја, али је *Одлуком о уплатним рачунима прихода Буџета и фондова Брчко дистрикта Босне и Херцеговине, начину уплаћивања тих прихода и начину и роковима извјештавања корисника прихода* (Дирекција за финансије Брчко дистрикта од 6. 7. 2015. године) у

члану 16. (Новчане казне), прописано да су приход Буџета новчане казне изречене од судова, полиције и органа управе Дистрикта и то новчане казне за прекршаје и трошкови поступка од физичких лица, од правних лица, новчане казне и трошкови поступка које изричу органи управе Дистрикта, новчане казне за прекршаје које су регистроване у регистру новчаних казни и трошкови прекршајног поступка. Надаље, члан 47. Закона о безбједности саобраћаја на путевима Брчко дистрикта Босне и Херцеговине („Службени гласник БД БиХ“, бр. 13/07 и 19/07), (Намјена средстава наплаћених по основу новчаних казни), прописује да „Новчане казне наплаћене према овом закону приход су Буџета Дистрикта...“.

Такође, супротно Закону о прекршајима Босне и Херцеговине, у члану 240. Закона о основама безбједности саобраћаја на путевима у Босни и Херцеговини („Службени гласник БиХ“, бр. 6/06, 75/06, 44/07, 84/09, 48/10, 18/13 и 8/17) прописано је да сви приходи настали примјеном овог закона припадају надлежним органима који су дужни да обезбиједи спровођење овог закона (Босне и Херцеговине, ентитета, кантона, Брчко дистрикта, локалне самоуправе и локалне управе у градовима и општинама). Дакле, цитирана одредба, тумачена како језички тако и логички, недвосмислено указује да новчане казне за прекршаје који су прописани Законом о основама безбједности саобраћаја на путевима у Босни и Херцеговини нису приход Буџета Босне и Херцеговине како је то прописано чланом 44. Закона о прекршајима БиХ, него припадају оном нивоу из којег се финансира надлежни орган из којег је овлашћено лице за послове контроле и регулисања саобраћаја на путевима (ентитет, кантон,...).

Други закони институција Босне и Херцеговине (нпр. Закон о ветеринарству Босне и Херцеговине, Закон о заштити потрошача Босне и Херцеговине, Закон о радном времену, обавезним одморима мобилних радника и уређајима за евидентирање у друмском превозу,...) у којима су прописани прекршаји, прописују да поступак може покренути овлашћени орган ентитета, Брчко дистрикта или кантона (инспекцијски органи, полиција), али не прецизирају припадност прихода од новчаних казни за починиоце ових прекршаја, те сходно наведеним прописима ентитета и Брчко дистрикта ове казне су приход буџета из којег се финансира овлашћени орган који је покренуо прекршајни поступак.

Савјет министара Босне и Херцеговине на 105. сједници, одржаној 13. 6. 2017. године, размотрио је и усвојио Информацију о поступању по закључку 78. сједнице Савјета министара Босне и Херцеговине (сачињена на приједлог Радне групе представника Министарства правде БиХ, ентитетских министарстава правде и Правосудне комисије Брчко дистрикта која је предложила да Савјет министара задужи Министарство правде Босне и Херцеговине да припреми измјену члана 44. Закона о прекршајима у складу с чланом 240. Закона о основама безбједности саобраћаја на путевима у Босни и Херцеговини) и задружило Министарство правде да с представницима Министарства финансија и трезора и Министарства комуникација и транспорта предузме активности у вези с усклађивањем Закона о основама безбједности саобраћаја на цестама у Босни и Херцеговини са Законом о прекршајима.

Након одржаног састанка представника наведених институција, те изношења проблема с којима се надлежни органи у примјени закона сусрећу, закључено је да је неопходно измијенити Закон о прекршајима БиХ и Правилник о вођењу прекршајне евиденције БиХ, те договорено да у раду треба да учествују и друге релевантне институције. Поред

представника задужених министарстава, у креирању рјешења за измјене Закона о прекршајима БиХ и Правилника о вођењу прекршајне евиденције БиХ учествовали су и представници Граничне полиције Босне и Херцеговине, Управе за индиректно опорезивање, Агенције за идентификационе документе и размјену података Босне и Херцеговине и Дирекције за цивилно ваздухопловство Босне и Херцеговине.

Образложење предложених одредби:

Покушај је, дакле, један од могућих видова окончања стадијума извршења и он обухвата оне радње којима учинилац већ улази у стадијум извршења. У том смислу он се јавља као започети, а не довршени прекршај и за разлику од довршеног прекршаја као основне форме кажњивог понашања, покушај као непотпуни прекршај није кажњив. Међутим, чланом 4. Закона о прекршајима предвиђено је да се „Прекршаји прописују законима Босне и Херцеговине и одлукама Савјета министара Босне и Херцеговине“, те ако се за одређене прекршаје изричито пропише, покушај ће бити кажњив.

Због проблематике коју Гранична полиција БиХ има када је у питању уручење прекршајних налога појединим авиокомпанијама које немају представништво у БиХ, предложена је допуна става (3) у члану 29, којом је продужен рок за уручење прекршајних налога ван територије Босне и Херцеговине.

Сходно члану 33. Закона, окривљеном који нема пребивалиште у Босни и Херцеговини, а који прими прекршајни налог, може се понудити могућност да плати новчану казну у најближој полицијској станици или у канцеларији овлашћеног органа. Цијенећи да нису ријетки случајеви примјене ове одредбе, представници Граничне полиције БиХ образложили су потребу допуне ове одредбе, ради намирања трошкова који настану при уплати средстава датих за новчану казну.

Цијенећи да је Агенција за идентификационе документе и размјену података Босне и Херцеговине унаприједила вођење "прекршајних евиденција", а ради лакшег праћења извршења новчаних казни, односно праћења исхода судског поступка по захтјевима за покретање прекршајног поступка, извршена је допуна члана 37. Закона, а унос података је детаљније прописан у Правилнику о вођењу прекршајне евиденције БиХ, који је такође усагласила радна група с прописима и праксом Агенције за идентификационе документе и размјену података Босне и Херцеговине.

Представници свих институција које су учествовале у креирању овог прописа сагласили су се да се усклађивање Закона о основама безбједности саобраћаја на цестама у Босни и Херцеговини са Законом о прекршајима предложи на начин како је то учињено допуном члана 44. Закона о прекршајима из 2012. године, чиме је Управа за индиректно опорезивање изузета од одредбе става (1) цитираног члана. Поново се истиче да су овлашћени органи надлежни за спровођење Закона о основама безбједности саобраћаја на цестама у Босни и Херцеговини од његовог усвајања 2006. године поступали по члану 240. тог закона, што оправдава усвајање предложене допуне члана 44. Закона о прекршајима.

IV – УСКЛАЂЕНОСТ ПРОПИСА С ЕВРОПСКИМ ЗАКОНОДАВСТВОМ

Материја која се уређује предложеним рјешењима закона није регулисана правно обавезујућим актима ЕУ, али то никако не умањује обавезу међусобне хармонизације и постизања највећег степена усаглашености прописа, како с уставом тако и другим законима и прописима.

V – КОНСУЛТАЦИЈЕ

Министарство правде БиХ је извршило детаљну анализу Извјештаја о финансијској ревизији Министарства правде Босне и Херцеговине за 2013. годину и 2014. годину, сачинило двије информације о проблемима у вези с примјеном Закона о прекршајима у Босни и Херцеговини с освртом на прописе којим су прописане прекршајне одредбе, а које је разматрао и усвојио Савјет министара Босне и Херцеговине, те са представницима надлежних министарстава и других релевантних институција припремило понуђена рјешења.

У складу с Правилима за консултације у изради правних прописа (“Службени гласник БиХ”, бр. 81/06 и 80/14) спроведене су консултације, те на предложени текст Нацрта закона није било сугестија ни коментара.

На Нацрт закона прибављена су потребна мишљења и прихваћене примједбе на достављени текст.

VI – РЕВИЗИЈА ПОСТОЈЕЋИХ ПРОПИСА

Доношење и примјена овог закона захтијева измјене и допуне Правилника о вођењу прекршајне евиденције (“Службени гласник БиХ”, број 25/09).

VII – ФИНАНСИЈСКА СРЕДСТВА

За спровођење овог закона неће бити потребно предвидјети додатна средства у Буџету Босне и Херцеговине.



Broj: 03-1-02-1-161-2/18 EM
Sarajevo, 08.02.2018. godine

Ministarstvo pravde Bosne i Hercegovine
Trg Bosne i Hercegovine br. 1
71 000 Sarajevo

BOSNA I HERCEGOVINA
MINISTARSTVO PRAVDE
SARAJEVO

PRIMLJENO:	08-02-2018		
Organizaciona jedinica	Klasifikaciona oznaka	Redni broj	Službena pošta
06	02-4	8641/17	7

Predmet: Nacrt Zakona o dopunama Zakona o
prekršajima,
Mišljenje – *dostavlja se*,

Veza: Vaš akt broj: 06-02-4-8641/17 od 27.11.2017. godine

Agenciji za zaštitu ličnih podataka u Bosni i Hercegovini u prilogu akta broj i datum Veze, dostavljen je na mišljenje Nacrt Zakona o dopunama Zakona o prekršajima.

Agencija shodno članu 40. stav (1) tačka d) Zakona o zaštiti ličnih podataka („Sl. glasnik BiH“, broj: 49/06, 76/11 i 89/11) daje sljedeće:

MIŠLJENJE

U članu 4. Nacrta Zakona o dopunama Zakona o prekršajima (u daljem tekstu: Nacrt), predviđen je tekst člana 37. stav (7) koji glasi: „Ovlašteni organi iz člana 3. stav (1) tačka a) ovog zakona mogu voditi vlastitu prekršajnu evidenciju, a sami propisuju sadržaj i način vođenja te evidencije.“

Zakon o zaštiti ličnih podataka u članu 4. stav (1) tačka a) propisuje princip koji obavezuje kontrolora da lične podatke obrađuje na pravičan i zakonit način, što podrazumijeva obradu ličnih podataka na osnovu i u granicama zakona, te ukoliko je obrada neophodna radi ispunjenja određene svrhe.

Mišljenja smo da citirana odredba Nacrta ne ispunjava osnovne uslove principa pravičnosti i zakonitosti, obzirom da ista ostavlja mogućnost za proizvoljno propisivanje evidencija neodređenim aktima, kao i za arbitrarno kreiranje pravila za obradu ličnih podataka.

Napominjemo da su Evropski parlament i Savjet Evropske unije donijeli Uredbu 2016/679 o zaštiti pojedinaca u vezi sa obradom ličnih podataka i o slobodnom kretanju takvih podataka, te o stavljanju van snage Direktive 95/46/EZ (Opšta uredba o zaštiti podataka). Uredba je stupila na snagu 25. maja 2016. godine, a primjenjivaće se od 25. maja 2018. godine.

Članom 6. stav (1) tačka e) Opšte uredbe o zaštiti ličnih podataka propisano je da je obrada ličnih podataka zakonita ako je nužna za izvršavanje zadatka od javnog interesa za izvršenje ovlaštenja kontrolora. U tom slučaju, kako je propisano stavom (3) istog člana, zakonom se propisuju: opšti uslovi kojima se uređuje zakonitost obrade koju vrši kontrolor, vrste podataka koji se obrađuju, kategorije nosilaca podataka, subjekte kojima se lični podaci mogu otkriti i svrhe u koje se podaci mogu otkriti, ograničenje svrhe, rokove čuvanja, te radnje obrade i postupke obrade, uključujući i mjere za obezbjeđivanje zakonite i pravične obrade, kao i za

druge posebne obrade. Taj zakon mora ostvariti cilj od javnog interesa i obrada mora da bude srazmjerna zakonitom cilju kojem se teži.

Potpisivanjem Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine, preuzeta je obaveza usklađivanja zakonodavstva koje se odnosi na zaštitu ličnih podataka, s pravom Zajednice i drugim evropskim i međunarodnim zakonodavstvom o privatnosti.

S poštovanjem,

Dostaviti:


- Naslovu,
- Spis predmeta





Broj: 03/A-06-2-VB-1902-2/17

Sarajevo: 12. prosinac 2017. godine

BOSNA I HERCEGOVINA
MINISTARSTVO PRAVDETrg Bosne i Hercegovine 1
SarajevoPredmet: Mišljenje o usklađenosti Nacrta zakona o dopunama Zakona o prekršajima sa *acquis-*
em

Veza: Vaš akt broj: 06-02-4-8641/17 od 27.11.2017. godine (zaprimljen 01.12.2017.)

Na temelju članka 18. Zakona o ministarstvima i drugim organima uprave Bosne i Hercegovine („Službeni glasnik BiH“, br. 5/03, 42/03, 36/04, 42/04, 45/06, 88/07, 35/09, 103/09, 87/12, 6/13 i 19/16) i članka 6. Odluke o Direkciji za europske integracije („Službeni glasnik BiH“, broj 41/03) Direkcija za europske integracije daje sljedeće:

MIŠLJENJE

Nacrtom zakona o dopunama Zakona o prekršajima (u daljnjem tekstu: Nacrt zakona) vrše se dopune odredbi Zakona o prekršajima („Službeni glasnik BiH“ br. 41/07, 18/12, 36/14 i 81/15) koje se odnose na naplatu prihoda od novčanih kazni u cilju ujednačavanja njihove primjene, odnosno usklađivanja sa odredbama ranije usvojenog Zakona o osnovama sigurnosti prometa na putevima u Bosni i Hercegovini („Službeni glasnik BiH“, br. 6/06, 75/06, 44/07, 84/09, 48/10, 18/13 i 8/17) a u smislu preciziranja pripadnosti prihoda od novčanih kazni.

Također, dodatno se dopunjuju i odredbe koje se tiču određenih faza samog prekršaja i njihove kažnjivosti, produženja roka za uručenje pojedinih prekršajnih naloga, obveze plaćanja troškova koji nastanu pri uplati sredstava datih za novčanu kaznu, te olakšavanja praćenja izvršenja novčanih kazni putem elektronskih prekršajnih evidencija.

Analizom sekundarnih izvora prava Europske unije utvrđeno je da materija koja se uređuje Nacrtom zakona nije regulirana pravno obavezujućim aktima Europske unije, te za istu ne postoji obveza usklađivanja zakonodavstva u skladu sa člankom 70. Sporazuma o stabilizaciji i

pridruživanju između Europskih zajednica i njihovih država članica s jedne, i Bosne i Hercegovine, s druge strane („Službeni glasnik BiH – Međunarodni ugovori“, br. 10/08, 1/17 i 8/17).




Dostavljeno:

1. Naslovu
2. a/a



BOSNIA AND HERZEGOVINA
MINISTRY OF FINANCE
AND TREASURY



Broj: 05-02-1-10525-2/17
Sarajevo, 26.12.2017.godine

BOSNA I HERCEGOVINA
Ministarstvo pravde

Predmet: Mišljenje na nacrt Zakona o dopunama Zakona o prekršajima.

Veza: Vaš akt broj: 06-02-4-8641/17 od 27.11.2017. godine

Vezano za Vaš dopis, broj naveden u vezi, u Ministarstvo finansija i trezora Bosne i Hercegovine zaprimljen 1.12.2017. godine, a kojim se traži Mišljenje na nacrt Zakona o dopunama Zakona o prekršajima, sukladno odredbama članka 31. pod e). Poslovnika o radu Vijeća ministara Bosne i Hercegovine („Službeni glasnik BiH“, broj 22/03), dajemo

MIŠLJENJE

1. Predmetnim zakonom *dopunjuju se* čl. 2., 29., 33., 37., 44. Zakona prekršajima („Službeni glasnik BiH“, br. 41/07, 18/12, 36/14 i 81/15).
2. U Obrazloženju zakona dostavljenom u prilogu akta navedenog u vezi, obrađeni su: ustavni temelji, razlozi za uvođenje propisa, konzultacije te pod IV - **Financijska sredstva**, u kojem dijelu je konstatirano da *za provedbu ovog zakona neće biti potrebna predvidjeti dodatna sredstva u Proračunu institucija Bosne i Hercegovine, što je potvrđeno i Obrascem broj 2a-OFP NE propisanim Aneksom I - člankom 12. Jedinствених правила за израду правних прописа у институцијамa Bosne i Hercegovine („Službeni glasnik BiH“, br 11/05, 58/14, 60/14 i 50/17) koji je dostavljen u prilogu akta navedenog u vezi.*
3. Imajući u vidu konstatirano u točki 2. ovog mišljenja, Ministarstvo finansija i trezora Bosne i Hercegovine, **daje pozitivno mišljenje na nacrt Zakona o dopunama Zakona o prekršajima.**

S poštovanjem,

DOSTAVITI:

- naslovu
- Sektoru za proračun institucija Bosne i Hercegovine
- a/a



OBRAZAC broj 2a O FISKALNOJ PROCJENI UTICAJA

Obrazac OFP-NE

ODJELJAK A. Nosilac normativnog posla		NAZIV	
Razdjel	KOD	Ministarstvo pravde Bosne i Hercegovine	
	0904		

ODJELJAK B. Osnovni podaci o propisu						
Vrsta propisa	Ustav	Ne	Poslovnik	Ne	Pravilnik	Ne
	Sporazum	Ne	Odluka	Ne	Drugi opći pravni akt	Ne
	Zakon	Da	Uputstvo	Ne		
	Naziv propisa					

Nacrt Zakona o dopunama Zakona o prekršajima

ODJELJAK C. Izjava o nepostojanju dodatnih fiskalnih uticaja na budzet

Za provođenje ovog propisa nisu potrebna dodatna finansijska sredstva



ODJELJAK D. Pečat i potpis odgovornog lica Institucije BiH	Potpis rukovodioca nosioca normativnog posla	Josip Grubeša, ministar
Mjesto i datum		

ODJELJAK E. Mišljenje Ministarstva finansija i trezora	Potpis ministra finansija i trezora
Mjesto i datum	

Misljenje Ministarstva finansija i trezora: prihvaćeno, bez primjedbi, 21.11.2017. godine u prijedlogu

broj: 05-02-9-10625-2/17 dat 26.11.2017. godine u prijedlogu

[Signature]



Broj: 07-10-02-1-3769-2/17

Datum: 26.12.2017. godine



BOSNA I HERCEGOVINA
MINISTARSTVO PRAVDE
n/r g. Josipa Grubeše, ministra

PREDMET: Nacrt zakona o dopunama Zakona o prekršajima, mišljenje, dostavlja se

VEZA: Vaš akt broj 06-02-4-8641/17 od dana 27.11.2017. godine

Poštovani,

U prilogu dopisa dostavljamo Vam mišljenje Ministarstva za ljudska prava i izbjeglice Bosne i Hercegovine u skladu sa članom 31. stav (1) tačka c) Poslovnika o radu Vijeća ministara Bosne i Hercegovine u pogledu usklađenosti sa propisima o ostvarivanju građanskih prava i sloboda i temeljnih sloboda međunarodnog humanitarnog prava.

Ministarstvo za ljudska prava i izbjeglice Bosne i Hercegovine (u daljem tekstu: Ministarstvo) je razmotrilo usklađenost Nacrta zakona o dopunama Zakona o prekršajima (u daljem tekstu: Nacrt zakona), sa članom 26. stav (2) tačka f) Zakona o ravnopravnosti spolova u BiH („Službeni glasnik BiH“ broj 32/10) i članom 24. stav (2) Zakona o zabrani diskriminacije u BiH („Službeni glasnik BiH“ broj 59/09 i 66/16), i u vezi s navedenim daje sljedeće

MIŠLJENJE

Nakon izvršenog uvida u sadržaj dostavljenog Nacrta zakona o dopunama Zakona o prekršajima, ovom prilikom, u pogledu usklađenosti istog sa propisima o ostvarivanju građanskih prava i sloboda i temeljnih sloboda međunarodnog humanitarnog prava, konstatujemo da pomenuti Nacrt zakona treba biti usklađen sa članom 14. Evropske konvencije o ljudskim pravima i osnovnim slobodama i Protokolom 12, a koji se odnose na opću zabranu diskriminacije.

U pogledu usklađenosti dostavljenog Nacrta zakona sa Zakonom o ravnopravnosti spolova u BiH, Ministarstvo sugeriše predlagaču da dopuni Nacrt zakona u smislu uvrštavanja odredbe koja bi se odnosila na upotrebu jezika bez diskriminacije i koja treba da glasi:

„Izrazi koji su radi preglednosti dati u jednom gramatičkom rodu bez diskriminacije se odnose i na muškarce i na žene“.

Naime, u Nacrtu zakona, suprotno članu 9. tačka e) Zakona o ravnopravnosti spolova u BiH, se isključivo koristi samo jedan gramatički rod kao generički pojam.

Ukazujemo također i na odredbu člana 44a. Jedinostvenih pravila za izradu pravnih propisa u institucijama Bosne i Hercegovine („Službeni glasnik BiH“ broj 58/14), prema kojem su nosioci normativnih poslova dužni u uvodnim odredbama propisa navesti definiciju koja se odnosi na upotrebu jezika bez diskriminacije.

Zakon o zabrani diskriminacije u BiH propisuje članom 3. stav (2) posrednu diskriminaciju kao oblik diskriminacije. Posrednom diskriminacijom smatrat će se naizgled neutralna odredba, kriterij ili praksa, koja ima ili bi imala učinak dovođenja nekog lica ili grupe lica u nepovoljan ili manje povoljan položaj u odnosu na druga lica, što može biti slučaj ukoliko se ne uvaži primjedba koja se odnosi na uvrštavanje odredbi u skladu sa Zakonom o ravnopravnosti spolova u BiH.

Ukoliko predlagač Zakona uvaži navedene sugestije, Ministarstvo podržava Nacrt Zakona o dopunama Zakona o prekršajima, u suprotnom ne može podržati Nacrt zakona u predloženom tekstu.

S poštovanjem,

 **MINISTRICA**
Semira Borovac
Semira Borovac

Dostaviti:

- naslovu
- a/a

Način otpreme: kurir



BOSNA I HERCEGOVINA
Vijeće ministara
Ured za zakonodavstvo

БОСНА И ХЕРЦЕГОВИНА
Савјет министара
Уред за законодавство

Broj: 04-02-1-1059/17
Sarajevo, 11.12.2017.godine
(LSH)



BOSNA I HERCEGOVINA
MINISTARSTVO PRAVDE

SARAJEVO

PREDMET: Mišljenje o Nacrtu zakona o dopunama Zakona o prekršajima

Veza vaš broj: 06-02-4-8641/17 od 27.11.2017. godine

Ured za zakonodavstvo Vijeća ministara Bosne i Hercegovine, razmotrio je **Nacrt zakona o dopunama Zakona o prekršajima**, i na osnovu člana 25. stav 1. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), daje

MIŠLJENJE

Ustavni osnov za donošenje predmetnog Zakona sadržan je u članu IV. 4. a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva ili za vršenje funkcija Skupštine po ovom Ustavu.

Razlozi za donošenje zakona o dopunama Zakona o prekršajima („Službeni glasnik BiH“, br. 41/07, 18/12, 36/14 i 81/15) sastoje se u potrebi da se u saradnji s institucijama koje su uključene u proces naplate prihoda od novčanih kazni riješi pitanje evidentiranja naplaćenih novčanih kazni, te uz angažiranje relevantnih institucija nastavi aktivnosti na osiguranju uslova za praćenje naplate novčanih kazni kod izdatelja prekršajnog naloga.

Vijeće ministara Bosne i Hercegovine na 78. sjednici održanoj 24. oktobra 20126. godine, razmotrilo je i usvojilo Informaciju o problemima u vezi s primjenom Zakona o prekršajima u Bosni i Hercegovini, te prihvatilo stav Ministarstva pravde Bosne i Hercegovine da do različite

primjene odredbi o pripadnosti prihoda od novčanih kazni za prekršaje dolazi zbog neusklađenosti zakona koje primjenjuju ovlaštena tijela i sudovi prilikom izricanja prekršajnih sankcija.

Razlog ovakvog postupanja, odnosno neprimjenjivanja člana 44. Zakona o prekršajima, kojim je propisano da „Novčane kazne i sredstva pribavljena prodajom oduzetih predmeta za prekršaje koji su propisani zakonima i drugim propisima Bosne i Hercegovine, prihod su budžeta Bosne i Hercegovine“, od strane ovlaštenih tijela entiteta, kantona i Brčko distrikta Bosne i Hercegovine je što propisi na entitetskim nivoima i nivou Brčko distrikta definiraju pripadnost javnih prihoda, pa time i novčanih kazni od prekršaja.

Vijeće ministara Bosne i Hercegovine na 105. sjednici, održanoj 13. juna 2017. godine, razmotrilo je i usvojilo Informaciju o postupanju po zaključku 78. sjednice Vijeća ministara Bosne i Hercegovine i zadužilo Ministarstvo pravde Bosne i Hercegovine da s predstavnicima Ministarstva finansija i trezora i Ministarstva komunikacija i prometa poduzmu aktivnosti u vezi s usklađivanjem Zakona o osnovama sigurnosti saobraćaja na cestama u Bosni i Hercegovini sa Zakonom o prekršajima.

Nakon održanog sastanka predstavnika navedenih institucija, te iznošenja problema sa kojima se nadležni organi u primjeni susreću, zaključeno je, da je neophodno izmjeniti Zakon o prekršajima i Pravilnik o vođenju prekršajne evidencije („Službeni glasnik BiH“, broj 25/09), te dogovoreno da u radu trebaju učestvovati i druge relevantne institucije. Tako su u kreiranju izmjena Zakona o prekršajima i Pravilnika o vođenju prekršajne evidencije, pored predstavnika zaduženih ministarstava učestvovali i predstavnici Granične policije Bosne i Hercegovine, Uprave za indirektno oporezivanje, Agencije za identifikacione dokumente i razmjenu podataka Bosne i Hercegovine i Direkcije za civilno vazduhoplovstvo Bosne i Hercegovine.

Predloženim odredbama su pojedini dijelovi norme precizirani i jasnije definirani u skladu s potrebama prakse, čime se istima osigurava dosljednija i kvalitetnija primjena propisa, a istovremeno se osigurava i veća pravna sigurnost.

Ministarstvo pravde Bosne i Hercegovine izvršilo je detaljnu analizu Izvještaja o finansijskoj reviziji Ministarstva pravde za 2013. i 2014. godinu, sačinilo dvije informacije o problemima u vezi primjene Zakona o prekršajima, koje je razmatralo Vijeće ministara Bosne i Hercegovine, te sa predstavnicima nadležnih ministarstava i drugih relevantnih institucija pripremilo ponuđena rješenja.

U skladu sa Pravilima za konsultacije u izradi pravnih propisa („Službeni glasnik BiH“, broj 5/17), provedene su konsultacije na predloženi tekst zakona o dopunama Zakona o prekršajima, na koji nije bilo sugestija niti komentara.

Na dostavljeni tekst Nacrta zakona o dopunama Zakona o prekršajima, Ured za zakonodavstvo Vijeća ministara Bosne i Hercegovine nema sugestija, ali istovremeno ukazuje da je uz predmetne dopune Zakona o prekršajima („Službeni glasnik BiH“, br. 41/07, 18/12, 36/14 i 81/15), u daljoj proceduri, potrebno dostaviti pregled odredaba koje se mjenjaju ili dopunjavaju, te verziju prečišćenog teksta zakona.

Ured za zakonodavstvo Vijeća ministara Bosne i Hercegovine, uvidom u Program rada Vijeća ministara Bosne i Hercegovine za 2017. godinu, koje je Vijeće ministara Bosne i Hercegovine donijelo na 90. sjednici održanoj 1. februara 2017. godine i Program rada Ministarstva pravde Bosne i Hercegovine za 2017. godinu objavljen na internetskoj stranici ministarstva, konstatuje da Nacrt zakona o dopunama Zakona o prekršajima planiran za realizaciju u 2017. godini.

Nacrt zakona o dopunama Zakona o prekršajima, uz pribavljena mišljenja nadležnih institucija, uputiti u dalju proceduru.

Dostaviti:

-naslovu

-a/a





Na osnovu članka 17. točka 28. Zakona o Visokom sudbenom i tužilačkom vijeću Bosne i Hercegovine („Službeni glasnik BiH“, br. 25/04, 93/05, 48/07 i 15/08), razmatrajući Nacrt zakona o dopunama Zakona o prekršajima koji je dostavilo Ministarstvo pravde Bosne i Hercegovine, aktom broj: 06-02-4-8641/17 od 27.11.2017. godine, Visoko sudbeno i tužilačko vijeće Bosne i Hercegovine je, na sjednici održanoj 20. prosinca 2017. godine, dalo

MIŠLJENJE

na Nacrt zakona o dopunama Zakona o prekršajima

I Visoko sudbeno i tužilačko vijeće Bosne i Hercegovine (u daljem tekstu: Vijeće) konstatira da je materija sadržana u predloženom tekstu Nacrta zakona o dopunama Zakona o prekršajima (u daljem tekstu: Nacrt zakona) od utjecaja na pravosuđe u Bosni i Hercegovini, u smislu članka 17. točka 28. Zakona o Visokom sudbenom i tužilačkom vijeću BiH, te daje mišljenje kako slijedi.

II Imajući u vidu cilj zakonodavne inicijative, koji se prvenstveno odnosi na usuglašavanje zakonodavstva na nivou Bosne i Hercegovine, kao i sadržaj predloženih rješenja, Vijeće je suglasno sa Nacrtom zakona i podržava njegovo donošenje.

Broj: 08-02-1-3780-2/2017

Datum: 20. prosinac 2017. godine

Dostavljeno:

- Ministarstvo pravde BiH;
- a/a.

MP
Predsjednik
Milan Tegeltija



Bosna i Hercegovina

Ministarstvo pravde BiH



Босна и Херцеговина

Министарство правде БиХ

IZVJEŠTAJ O ODRŽANIM KONSULTACIJAMA SA ZAINTERESIRANOM JAVNOŠĆU

TEMA Nacrt zakona o dopunama Zakona o prekršajima

IZJAVA O SVRSI Otklanjanje uočenih problema na koje je skrenuta pažnja Izvještajima o finansijskoj reviziji Ministarstva pravde BiH za 2013. godinu i 2014. godinu, i provođenje zaključaka Vijeća ministara BiH u pravcu usaglašavanja propisa na nivou BiH.

OPIS TIJEKA KONSULTACIJA

Metode konsultacija

Online konsultacije

Datum početka 13.11.2017

Datum kraja 28.11.2017

Statistika

Broj učesnika: 0

Broj komentara: 0

Broj prijedloga: 0

Broj prihvaćenih prijedloga: 0

ZAKLJUČAK:

Online konsultacije za nacrt zakona o dopunama Zakona o prekršajima, održane su u periodu od 13.11. - 28.11.2017.godine, te nije zaprimljen niti jedan prijedlog, niti komentar od strane zainteresovane javnosti za izmjenu ili dopunu nacrtu zakona o dopunama Zakona o prekršajima. Shodno tome, Ministarstvo pravde Bosne i Hercegovine predlaže da se nacrt zakona o dopunama i izmjenama Zakona o prekršajima u daljnju proceduru uputi u neizmjenjenom tekstu.

VODITELJ KONSULTACIJA

Asim Fazlić

Koordinator konsultacija

Goran Kučera

Sarajevo, dana 5.12.2017

Aneks

Prikupljeni prijedlozi i komentari na dokument iz online konsultacija

Prijedlozi i komentari na Član 1

Prijedlozi:

Komentari:

Zbirni odgovor i obrazloženje na Član 1

Prijedlozi i komentari na Član 2

Prijedlozi:

Komentari:

Zbirni odgovor i obrazloženje na Član 2

Prijedlozi i komentari na Član 3

Prijedlozi:

Komentari:

Zbirni odgovor i obrazloženje na Član 3

Prijedlozi i komentari na Član 4

Prijedlozi:

Komentari:

Zbirni odgovor i obrazloženje na Član 4

Prijedlozi i komentari na Član 5

Prijedlozi:

Komentari:

Zbirni odgovor i obrazloženje na Član 5

Prijedlozi i komentari na Član 6

Prijedlozi:

Komentari:

Zbirni odgovor i obrazloženje na Član 6

Prikupljeni prijedlozi i komentari na priloge iz online konsultacija

ZAKON O PREKRŠAJIMA

(neslužbena prečišćena verzija s ugrađenim odredbama koje se mijenjaju)

I. OPĆE ODREDBE

Član 1.

(Predmet Zakona)

Ovim Zakonom propisuje se postupanje ovlaštenih organa u Bosni i Hercegovini kada odlučuju o prekršajima propisanim zakonima i drugim propisima institucija Bosne i Hercegovine i nadležnost i postupanje sudova u Federaciji Bosne i Hercegovine, Republici Srpskoj i Brčko Distriktu Bosne i Hercegovine (u daljnjem tekstu: sudovi), radi odlučivanja o prekršajima propisanim zakonima i drugim propisima institucija Bosne i Hercegovine.

Član 2.

(Definicija prekršaja)

(1) Prekršaji predstavljaju kršenja javnog poretka ili propisa o ekonomskom i finansijskom poslovanju, utvrđena zakonom ili drugim propisom, za koje su određena obilježja prekršaja i za koje su propisane sankcije.

(2) Prekršaj može biti počinjen činjenjem ili nečinjenjem.

(3) Nehat izvršioca dovoljan je da se izvršilac smatra odgovornim za prekršaj, osim ako je odredbama o prekršajima propisano da će biti kažnjen za djelo počinjeno isključivo s umišljajem.

(4) Prekršaj mogu počiniti fizička i pravna lica.

(5) Pokušaj počinjenja prekršaja nije kažnjiv, **osim ako je kažnjavanje za pokušaj izričito propisano.**

(6) Odredbe ovog zakona primjenjuju se na sve osobe bez diskriminacije po bilo kom osnovu, u skladu sa Zakonom o zabrani diskriminacije.

Član 3.

(Značenje izraza)

(1) Posebni izrazi u smislu ovog Zakona imaju sljedeće značenje:

a) *Ovlašteni organ* je:

1) nadležni policijski organ Bosne i Hercegovine, Federacije Bosne Hercegovine, Republike Srpske, Brčko Distrikta Bosne i Hercegovine ili kantona;

2) inspektor ili lice ovlašteno za obavljanje inspekcije; ili

3) ministarstvo, preduzeće ili drugo pravno lice koje ima javna ovlaštenja i u čiju nadležnost spada direktno ili indirektno provođenje bilo kojeg zakona ili propisa koji propisuje prekršaje.

b) *Registar novčanih kazni* je baza podataka o novčanim kaznama za prekršaje kao što je propisano u Zakonu o centralnoj evidenciji i razmjeni podataka Bosne i Hercegovine.

- c) *Okrivljeni* je pravno ili fizičko lice protiv kojeg je pokrenut prekršajni postupak.
- d) *Oštećeni* je pravno ili fizičko lice koje je pretrpjelo štetu koja je na bilo koji način nastala činjenjem prekršaja.
- e) *Sud* je prvostepeni i drugostepeni sud nadležan da odlučuje o prekršajnim predmetima u skladu sa zakonima o sudovima u Federaciji Bosne i Hercegovine, Republici Srpskoj i Brčko Distriktu Bosne i Hercegovine.
- f) *Kažnjeni* je lice za koje je konačnim prekršajnim nalogom ili pravosnažnim rješenjem o prekršaju ustanovljeno da je odgovorno za određeni prekršaj.
- g) Uručenje poziva poštom je uručenje putem preporučene pošte na adresu fizičkog lica, koja se nalazi u Evidenciji prebivališta i boravišta građana Bosne i Hercegovine, koju u okviru svoje nadležnosti vodi Agencija za identifikacione dokumente, evidenciju i razmjenu podataka Bosne i Hercegovine ili na registriranu adresu domaćeg pravnog lica ili predstavništva stranog lica u Bosni i Hercegovini.

(2) Upotreba muškog ili ženskog roda podrazumijeva uključivanje oba roda.

(3) Izrazi navedeni u članu 1. Krivičnog zakona Bosne i Hercegovine (u daljnjem tekstu: Krivični zakon) koristit će se u ovom Zakonu, ukoliko se kontekstom jasno ne zahtijeva drugačije.

Član 4.

(Propisivanje prekršaja)

Prekršaji se propisuju zakonima Bosne i Hercegovine i odlukama Vijeća ministara Bosne i Hercegovine (u daljnjem tekstu: zakoni i drugi propisi Bosne i Hercegovine).

Član 5.

(Prava lica okrivljenih za prekršaje)

(1) Svako ko je okrivljen da je počinio prekršaj ima pravo zahtijevati da o njegovoj odgovornosti za počinjeni prekršaj odluči sud ukoliko je zahtjev podnesen u roku koji je propisan zakonom. Takva lica imaju pravo da:

- a) se smatraju nevinim dok se ne dokaže njihova odgovornost u skladu sa zakonom;
- b) u najkraćem roku budu obaviješteni, detaljno i na jeziku koji razumiju, o prirodi i razlogu optužbi protiv njih;
- c) im se da odgovarajuće vrijeme i mogućnosti za pripremu njihove odbrane;
- d) se brane lično ili uz pomoć branioca po vlastitom izboru, ili ukoliko nemaju dovoljno sredstava, da im se branilac osigura besplatno kada to zahtijevaju interesi pravde;
- e) ispituju ili da se u njihovo ime ispituju svjedoci koji ih terete i da se osigura prisustvo i saslušanje svjedoka u njihovu korist pod istim uvjetima kao i svjedoka koji ih terete i
- f) dobiju besplatnu pomoć prevodioca ako ne razumiju jezik koji se upotrebljava na sudu.

Član 6.

(Lišavanje slobode i garancija kao osiguranje prisustva i plaćanja novčane kazne)

(1) Policijski službenik ili ovlašteno službeno lice može lišiti slobode lice koje je osumnjičeno za počinjenje prekršaja, ali je dužno takvo lice odmah, a najkasnije u roku od 12 sati, izvesti pred sud, kako bi se osiguralo njegovo prisustvo na sudu u slučaju kada:

- a) lice odbije ili nije u mogućnosti otkriti svoj identitet; ili

b) lice nije nastanjeno u Bosni i Hercegovini ili privremeno boravi u inozemstvu, a postoji sumnja da može pobjeći kako bi izbjeglo odgovornost za prekršaj ili

c) postoji opasnost da će lice nastaviti s činjenjem prekršaja ili ponovo počiniti istovrsni prekršaj.

(2) Sud mora ispitati okrivljenog odmah, a najkasnije u roku od 12 sati.

(3) Svako lišavanje slobode može biti određeno samo ako se isti cilj ne može ostvariti drugom mjerom i mora biti razumno i u skladu s prirodom počinjenog prekršaja, a mora se voditi računa o starosti i drugim ličnim svojstvima tog lica, tako da dužina trajanja lišavanja slobode odgovara okolnostima. Svako lice lišeno slobode u skladu s odredbama ovog člana mora biti u najkraćem roku obaviješteno, detaljno i na jeziku koji razumije, o razlozima za lišavanje slobode, kao i o prekršaju koji mu se stavlja na teret.

(4) Radi osiguranja prisustva pred sudom, policija ili drugi ovlašteni organ može zahtijevati od lica koje je okrivljeno za prekršaj, a koje nema prebivalište u Bosni i Hercegovini ili koje privremeno boravi u inozemstvu i želi da napusti Bosnu i Hercegovinu prije okončanja postupka, a za koje postoji sumnja da može pobjeći kako bi izbjeglo odgovornost za prekršaj, da preda svoj pasoš ili drugi identifikacioni dokument do pojavljivanja na sudu, ali ne duže od 72 sata. Uz prekršajni nalog ili zahtjev za pokretanje prekršajnog postupka sudu će se predati i pasoš ili drugi identifikacioni dokument.

(5) Radi osiguranja plaćanja novčane kazne, licu koje je okrivljeno za prekršaj koje nema prebivalište u Bosni i Hercegovini ili koje privremeno boravi u inozemstvu, a želi napustiti Bosnu i Hercegovinu prije okončanja postupka, a za koje postoji sumnja da može pobjeći kako bi izbjeglo odgovornost za prekršaj, sudija može naložiti da položi novčanu garanciju u visini maksimalne kazne koja može biti izrečena za takav prekršaj.

Član 7.

(Primjena prekršajnog zakonodavstva Bosne i Hercegovine)

Prekršajno zakonodavstvo Bosne i Hercegovine primjenjuje se prema svakome ko počinji prekršaj na teritoriji Bosne i Hercegovine, ili na njenom plovilu ili civilnom zrakoplovu bez obzira gdje se nalazi u vrijeme počinjenja.

Član 8.

(Propisi koji se primjenjuju)

(1) Postupajući po prekršajima propisanim zakonom ili drugim propisom Bosne i Hercegovine, sudovi primjenjuju odgovarajući zakon o prekršajima koji je u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine, te primjenjuju materijalnopravne propise i krivične odredbe zakona ili propisa Bosne i Hercegovine koji propisuju prekršaj.

(2) Na sva opća materijalnopravna pitanja prekršajnog zakonodavstva, koja nisu propisana Poglavljem II ovog Zakona, primjenjuje se zakon o prekršajima koji je u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine, kao primjenjivo pravo suda koji vodi postupak.

Član 9.

(Stvarna nadležnost)

Za postupanje po prekršajima propisanim zakonima i drugim propisima Bosne i Hercegovine stvarno su nadležni sudovi u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 10.

(Mjesna nadležnost)

(1) Za vođenje prekršajnog postupka mjesno je nadležan sud na čijem je području prekršaj izvršen.

(2) Ako je očito da će se postupak provesti lakše ili da će troškovi postupka biti manji ili ako za to postoje drugi opravdani razlozi, postupak se može provesti i pred sudom na čijem je području počinitelj otkriven ili uhvaćen ili pred drugim sudom.

Član 11.

(Posebna mjesna nadležnost)

Ako je prekršaj počinjen na plovilu ili zrakoplovu Bosne i Hercegovine, za vođenje prekršajnog postupka mjesno je nadležan sud na čijem se području nalazi domaća luka u kojoj se završava putovanje počinioca prekršaja, a ako je počinitelj prekršaja član posade plovila ili zrakoplova, sud na čijem se području nalazi matična luka plovila ili zrakoplova.

Član 12.

(Pomoćna nadležnost)

Ako se mjesna nadležnost suda ne može odrediti prema mjestu izvršenja prekršaja, mjesno je nadležan sud na čijem području počinitelj ima prebivalište ili boravište, odnosno sud na čijem području je sjedište domaćeg pravnog lica ili predstavništva stranog lica u Bosni i Hercegovini.

Član 13.

(Nadležnost suda pred kojim je ranije pokrenut postupak)

Ako bi, prema odredbama čl. 10. i 11. ovog Zakona, istovremeno bila nadležna dva ili više sudova, nadležan je sud pred kojim je ranije pokrenut postupak, ali će svaki sud na svom području preduzeti radnje koje ne trpe odgađanje.

Član 14.

(Nadležnost za saučesnike i spajanje i razdvajanje postupka)

(1) Sud, koji je nadležan za počinioca, nadležan je i za saučesnike.

(2) Za počinioca i saučesnike provest će se jedan postupak, ali se iz važnih razloga postupci protiv pojedinih saučesnika mogu razdvojiti i provesti odvojeno.

(3) Kada se pokreću ili vode postupci protiv istog lica za više prekršaja ili protiv više lica za isti prekršaj, na spajanje i razdvajanje postupka primjenjuju se odredbe zakona o prekršajima koji su u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 15.

(Sukob nadležnosti)

Sukob nadležnosti za vođenje prekršajnog postupka i odlučivanje o prekršajnim predmetima rješava se u skladu sa zakonima o sudovima u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 15a.

(Prekršajna odgovornost pravnih lica i odgovornih lica u pravnim licima)

(1) Ovim zakonom uređuje se prekršajna odgovornost pravnih lica i odgovornih lica u pravnim licima.

(2) Prekršajna odgovornost pravnog lica prestaje prestankom njegovog postojanja, a u slučaju postojanja njegovog pravnog sljednika, za prekršaj odgovara njegov sveukupni pravni sljednik. Ako je sljednika više, sud će utvrditi koji od njih, s obzirom na prirodu sljedništva, odgovara za prekršaj.

(3) Odredbe ovog zakona kao i drugih propisa koji se odnose na prekršajnu odgovornost pravnog lica i u njemu odgovornih lica primjenjuju se i na s njima izjednačene subjekte: predstavništva i poslovne jedinice domaćih i stranih lica, druge subjekte koji nemaju pravnu sposobnost, ali samostalno nastupaju u pravnom prometu, te na odgovorna lica u tim subjektima.

Član 15b.

(Osnova odgovornosti pravnog lica i odgovornog lica u pravnom licu)

(1) Pravno lice i odgovorno lice u pravnom licu prekršajno su odgovorni za povrede propisa o prekršaju.

(2) Propisom o prekršaju može se za prekršaj propisati prekršajna odgovornost samo pravnog lica.

(3) Sud će utvrditi prekršajno odgovornim pravno lice i u slučaju kada se utvrdi postojanje pravnih ili stvarnih prepreka za utvrđivanje odgovornosti odgovornog lica ili se ne može utvrditi ko je odgovorno lice.

Član 15c.

(Odgovorno lice)

(1) Odgovorno lice u smislu ovog zakona je fizičko lice koje vodi poslove pravnog lica ili mu je povjereno obavljanje određenih poslova iz oblasti djelovanja pravnog lica.

(2) Propisom o prekršaju može se propisati koje odgovorno lice u pravnom licu odgovara za određeni prekršaj.

(3) Odgovorno lice prekršajno odgovara za počinjeni prekršaj i u slučaju ako nakon počinjenja prekršaja prestane raditi u pravnom licu ili ako je nakon počinjenja prekršaja pravno lice prestalo postojati.

Član 15d.

(Isključenje i ograničenje odgovornosti pravnih lica)

(1) Bosna i Hercegovina, Federacija Bosne i Hercegovine, Republika Srpska, Brčko Distrikt Bosne i Hercegovine i kanton ne mogu prekršajno odgovarati.

(2) Jedinice lokalne samouprave odgovaraju za prekršaje koji su počinjeni radnjama koje ne ulaze u izvršavanje njihovih javnih ovlaštenja.

(3) Isključenje odgovornosti Bosne i Hercegovine, Federacije Bosne i Hercegovine, Republike Srpske, Brčko Distrikta Bosne i Hercegovine, kantona i jedinica lokalne samouprave prema st.

(1) i (2) ovog člana ne isključuje mogućnost prekršajne odgovornosti odgovornog lica za taj prekršaj u organima iz st. (1) i (2) ovog člana.

Član 16.

(Primjena odredbi Krivičnog zakona i Zakona o krivičnom postupku)

(1) Ukoliko nije drugačije propisano odredbama ovog Zakona, sljedeće odredbe Krivičnog zakona Bosne i Hercegovine ("Službeni glasnik BiH", br. 3/03, 32/03, 37/03, 54/04, 61/04, 30/05, 53/06 i 55/06) će se *mutatis mutandis* primjenjivati na prekršaje: "Nužna odbrana" i "Krajnja nužda"; "Saučesnici"; "Podstrekavanje"; "Pomaganje"; "Granice krivične odgovornosti i kažnjivosti saučesnika"; "Uračunljivost"; "Umišljaj"; "Nehat"; "Stvarna zabluda"; "Pravna zabluda" i "Odgovornost pravnih lica".

(2) Ukoliko nije drugačije propisano odredbama ovog Zakona, sljedeće odredbe Zakona o krivičnom postupku Bosne i Hercegovine ("Službeni glasnik BiH", br. 3/03, 32/03, 36/03, 26/04, 63/04, 13/05, 48/05, 46/06 i 76/06 - u daljnjem tekstu: Zakon o krivičnom postupku) će se *mutatis mutandis* primjenjivati u prekršajnom postupku: "Osnovni principi"; "Nadležnost suda"; "Izuzeće"; "Branilac"; "Pretnje stana i drugih prostorija i lica"; "Privremeno oduzimanje predmeta i imovine"; "Ispitivanje osumnjičenog"; "Saslušanje svjedoka"; "Uviđaj i rekonstrukcija"; "Vještačenje"; "Podnesci i zapisnici"; "Rokovi"; "Troškovi krivičnog postupka"; "Imovinskopравни zahtjevi"; "Glavni pretres"; "Žalba na prvostepenu presudu"; "Ponavljanje postupka"; "Postupak prema maloljetnicima" i "Postupak za primjenu mjera sigurnosti, za oduzimanje imovinske koristi pribavljene krivičnim djelom i za opozivanje uvjetne osude".

(3) U slučaju bilo kakvih nesaglasnosti između odredbi Krivičnog zakona iz stava (1) ovog člana i odredbi Zakona o krivičnom postupku iz stava (2) ovog člana i ovog Zakona, primjenjivat će se odredbe ovog Zakona. Upućivanje na odredbe Zakona o krivičnom postupku koje se odnose na tužioca će se na odgovarajući način primjenjivati na svaki ovlašteni organ.

II. MATERIJALNOPRAVNE ODREDBE

Član 17.

(Vrijeme i mjesto počinjenja prekršaja)

(1) Prekršaj je počinjen u vrijeme kada je počinilac radio ili bio dužan raditi, bez obzira kada je posljedica činjenja ili propuštanja nastupila.

(2) Prekršaj je počinjen kako u mjestu gdje je počinilac radio ili bio dužan raditi, tako i u mjestu gdje je posljedica njegovog činjenja ili propuštanja potpuno ili djelimično nastupila.

(3) Prekršaj je, u slučaju saučesništva, počinjen u mjestu određenom u stavu (2) ovog člana i u mjestu gdje je učesnik radio ili bio dužan raditi ili u mjestu gdje je, prema očekivanju učesnika, posljedica njegovog činjenja ili propuštanja trebalo da nastupi.

Član 18.

(Vrste sankcija)

(1) Sljedeće sankcije mogu biti izrečene licu odgovornom za počinjeni prekršaj:

- a) novčana kazna;
- b) uvjetna osuda;
- c) ukor; i
- d) zaštitne mjere.

(2) Sljedeće mjere mogu biti izrečene kao posljedica odgovornosti za počinjeni prekršaj:

- a) oduzimanje imovinske koristi;
- b) obaveza naknade štete;
- c) kazneni poeni; i
- d) lišavanje slobode radi naplate novčane kazne.

Član 19.

(Novčana kazna)

- (1) Novčana kazna može se propisati u određenom rasponu ili u fiksnom iznosu.
- (2) Fizičkom licu može se propisati novčana kazna u najmanjem iznosu od 30,00 KM, odgovornom licu u pravnom licu u najmanjem iznosu od 50,00 KM, a pravnom licu u najmanjem iznosu od 500,00 KM.
- (3) Zakonom se može propisati fizičkom licu novčana kazna u najvećem iznosu od 10.000,00 KM, odgovornom licu u pravnom licu novčana kazna u najvećem iznosu od 20.000,00 KM, a pravnom licu novčana kazna u najvećem iznosu od 200.000,00 KM.
- (4) Drugim propisom može se propisati fizičkom licu novčana kazna u najvećem iznosu od 3.000,00 KM, odgovornom licu u pravnom licu novčana kazna u najvećem iznosu od 5.000,00 KM, a pravnom licu novčana kazna u najvećem iznosu od 10.000,00 KM.
- (5) Za prekršaj, koji počinji pojedinac obavljaajući samostalnu poslovnu djelatnost, zakonom se može propisati novčana kazna u najvećem iznosu od 20.000,00 KM, a drugim propisom novčana kazna u najvećem iznosu od 6.000,00 KM.
- (6) Za prekršaj iz oblasti poreza i carina, novčane kazne mogu se propisati u višestrukom iznosu poreske ili carinske obaveze koja je trebalo da bude plaćena, ili kao procenat ili višestruki iznos vrijednosti robe koja je predmet prekršaja, ali ne u iznosu većem od 200.000,00 KM.

Član 20.

(Zaštitne mjere)

- (1) Zaštitne mjere mogu se propisati samo zakonom.
- (2) Za prekršaj se mogu propisati sljedeće zaštitne mjere:
 - a) oduzimanje predmeta;
 - b) zabrana obavljanja poziva, djelatnosti ili dužnosti;
 - c) potpuna ili djelimična zabrana upravljanja motornim vozilom i
 - d) vanbolničko liječenje od ovisnosti.
- (3) Zakonima koji propisuju prekršaje se mogu odrediti dodatne vrste zaštitnih mjera.

Član 21.

(Sticaj)

- (1) Ukoliko okrivljeni, jednom ili sa više radnji, počinji više prekršaja, novčana kazna bit će utvrđena za svaki pojedini prekršaj, a onda će se izreći jedinstvena novčana kazna na osnovu tako utvrđenih novčanih kazni.
- (2) Izrečena jedinstvena novčana kazna iz stava (1) ovog člana mora biti veća od svake pojedine utvrđene novčane kazne, ali ne smije preći zbir utvrđenih novčanih kazni.

Član 22.

(Zastarjelost pokretanja i vođenja postupka)

(1) Za prekršaj propisan zakonom ili drugim propisom Bosne i Hercegovine prekršajno gonjenje ne može se preduzeti kada od izvršenja prekršaja protekne:

a) za prekršaje za koje je propisana novčana kazna u iznosu do 3.000,00 KM kad protekne jedna godina od dana kada je prekršaj izvršen;

b) za prekršaje za koje je propisana novčana kazna u iznosu većem od 3.000,00 KM kad proteknu dvije godine od dana kada je prekršaj izvršen.

(2) Zakonom se mogu za određene prekršaje u oblasti poreza, carina, finansija, rada i zaštite na radu odrediti duži rokovi od rokova iz stava (1) ovog člana, ali ne duži od tri godine.

Član 23.

(Zastarjelost izvršenja zaštitnih mjera)

Zaštitna mjera neće se izvršiti kada protekne jedna godina od dana konačnosti prekršajnog naloga, odnosno pravosnažnosti rješenja kojim je izrečena.

Član 24.

(Izvršenje zaštitne mjere javnog objavljivanja odluke)

Zaštitna mjera javnog objavljivanja odluke suda izvršava se u sredstvima javnog informiranja dostupnim na cijeloj teritoriji Bosne i Hercegovine.

Član 25.

(Tok i prekid zastarjelosti)

(1) Zastarjelost za pokretanje i vođenje prekršajnog postupka počinje teći od dana kada je prekršaj izvršen, a zastarjelost za izvršenje zaštitne mjere od dana konačnosti prekršajnog naloga, odnosno pravosnažnosti rješenja kojim je zaštitna mjera izrečena.

(2) Zastarjelost se prekida svakom radnjom ovlaštenog organa za postupak odnosno za izvršenje, preduzetom radi gonjenja izvršioca prekršaja, odnosno izvršenja zaštitne mjere.

(3) Svakim prekidom zastarjelost počinje ponovo teći, ali bez obzira na prekide, zastarjelost u svakom slučaju nastaje kada protekne dva puta onoliko vremena koliko je predviđeno u čl. 22. i 23. ovog Zakona.

III. PREKRŠAJNI POSTUPAK

Član 26.

(Prekršajni postupak)

(1) Prekršajni postupak može pokrenuti ovlašteni organ na sljedeći način:

a) izdavanjem prekršajnog naloga; ili

b) podnošenjem zahtjeva za pokretanje prekršajnog postupka nadležnom sudu.

(2) Zahtjev za pokretanje prekršajnog postupka može se podnijeti samo u slučajevima kada ne postoje uvjeti za izdavanje prekršajnog naloga određeni u članu 27. ovog Zakona.

IV. PREKRŠAJNI NALOG

Član 27.

(Izdavanje prekršajnog naloga)

(1) Ovlašteni organ izdat će prekršajni nalog ukoliko ustanovi da je prekršaj iz njegove nadležnosti utvrđen na jedan od sljedećih načina:

- a) neposrednim opažanjem ovlaštenog službenog lica prilikom inspekcije, nadzora i pregleda;
- b) podacima koji su dobiveni uređajima za nadzor ili mjerenje;
- c) prilikom inspeksijskog ili drugog nadzora pregledom dokumentacije, prostorija i robe ili na drugi zakonit način ili
- d) na osnovu priznanja okrivljenog o izvršenju prekršaja u nekom drugom sudskom ili administrativnom postupku.

(2) Prekršajni nalog se može izdati samo u slučajevima kada odgovarajući zakon ili drugi propis određuje fiksnu novčanu kaznu, kada novčana kazna može biti izračunata korištenjem matematičke formule, ili kada ovlašteni organ odluči da izrekne minimalnu novčanu kaznu, odnosno zaštitnu mjeru u najkraćem trajanju ili zaštitnu mjeru oduzimanje predmeta određenu takvim zakonom ili drugim propisom.

(3) Ako okrivljeni izvrši više prekršaja u sticaju, tada ovlašteni organ može prekršajnim nalogom izreći jedinstvenu novčanu kaznu primjenom člana 21. ovog Zakona, a ako je za samo jedan od izvršenih prekršaja predviđena zaštitna mjera, može izreći i tu zaštitnu mjeru u najkraćem predviđenom trajanju.

(4) Ovlašteni organ koji je izdao prekršajni nalog može u svako vrijeme ispraviti greške u pisanju ili ostale očigledne greške, po službenoj dužnosti ili na prijedlog strana u postupku.

(5) Prekršajni nalog ne može biti izdat prema maloljetniku.

Član 28.

(Sadržaj prekršajnog naloga)

(1) Prekršajni nalog donosi se u pismenom obliku i mora sadržavati sljedeće podatke:

- a) naziv: prekršajni nalog;
- b) naziv ovlaštenog organa koji ga je izdao;
- c) ime i svojstvo službenog lica koje ga je izdalo;
- d) jedinstveni broj koji je odredio ovlašteni organ;
- e) datum izdavanja i datum uručenja kao što je određeno u članu 29. stav 3. ovog Zakona;
- f) prekršaj koji je počinio okrivljeni, naziv propisa i član koji određuje prekršaj;
- g) kada je okrivljeni fizičko lice - ime i prezime, i ukoliko je poznata, stalna adresa, jedinstveni matični broj, kao i mjesto zaposlenja, a za strance i broj pasoša;
- h) kada je okrivljeni pravno lice - naziv i sjedište, kao i jedinstveni identifikacioni broj za domaća pravna lica, a za strana lica naziv, sjedište i broj registra ili druge evidencije u državi sjedišta stranog lica, a ako strano lice ima predstavništvo u Bosni i Hercegovini, broj upisa u Registar predstavništava stranih lica u Bosni i Hercegovini;
- i) mjesto, datum i vrijeme kada je prekršaj počinjen;
- j) utvrđena sankcija, uključujući novčanu kaznu i/ili zaštitnu mjeru;
- k) iznos naknade štete, ukoliko se taj iznos može odrediti cjenovnikom i troškovi postupka ukoliko su određeni zakonom u fiksnoj iznosu;
- l) uputstvo da se novčana kazna, šteta i troškovi trebaju platiti ili da okrivljeni mora zatražiti sudsko odlučivanje o prekršajnom nalogu u roku od osam dana od dana uručenja;

m) uputstvo o načinu plaćanja novčane kazne, štete i troškova; i

n) potpis ovlaštenog predstavnika ovlaštenog organa.

(2) Ukoliko je prekršaj počinjen u saobraćaju i uključuje motorno vozilo, prekršajni nalog treba da sadržava sljedeće dodatne podatke:

a) registarski broj vozila i broj saobraćajne dozvole;

b) broj vozačke dozvole vozača, ukoliko je poznat; i

c) broj kaznenih poena koje zakon propisuje za takav prekršaj.

(3) Prekršajni nalog će, uz ostalo, sadržavati sljedeća uputstva:

a) da okrivljeni ima pravo podnijeti zahtjev za sudske odlučivanje o prekršajnom nalogu, naznačavajući kojem sudu i u kojem roku okrivljeni treba podnijeti zahtjev; i

b) da kazna koju je izrekao sud može biti veća od one koja je izrečena prekršajnim nalogom;

c) da će okrivljeni biti dužan nadoknaditi sudske troškove u slučaju kada zatraži sudske odlučivanje o prekršajnom nalogu ukoliko sud utvrdi da je on odgovoran za prekršaj naveden u prekršajnom nalogu; i

d) da će u slučaju prekršaja iz oblasti saobraćaja za koje zakon propisuje dodjeljivanje kaznenih poena, prihvatanje odgovornosti ili utvrđivanje odgovornosti od suda rezultirati dodjeljivanjem tih kaznenih poena.

(4) Prekršajni nalog sadrži pouku da, ako lice protiv kojeg je izdat prekršajni nalog prihvati odgovornost i najkasnije u roku od osam dana od dana prijema prekršajnog naloga plati polovinu izrečene novčane kazne, oslobađa se plaćanja druge polovine izrečene novčane kazne

(5) Prekršajni nalog sadržavat će određeno mjesto na kojem će se okrivljeni potpisati u slučaju da zahtijeva sudske rješavanje u skladu s članom 32. ovog Zakona.

(6) Ukoliko postoji dogovor između ovlaštenog organa i suda, prekršajnim nalogom može se odrediti datum i vrijeme usmenog pretresa, koji ne može biti kraći od osam dana od datuma izdavanja prekršajnog naloga.

(7) Svaki ovlašten organ može imati svoj obrazac prekršajnog naloga. Obrazac takvog prekršajnog naloga treba odobriti Ministarstvo pravde Bosne i Hercegovine.

(8) Obrasci prekršajnog naloga koje su odobrila entitetska ministarstva pravde mogu se koristiti u primjeni ovog Zakona ukoliko sadrže elemente iz stavova od (1) do (4) ovog člana i ako Ministarstvo pravde Bosne i Hercegovine odobri njihovo korištenje.

Član 29.

(Uručenje prekršajnog naloga)

(1) Prekršajni nalog sastoji se od originala i najmanje dvije kopije. Original zadržava ovlašten organ u svojoj evidenciji. Dvije kopije uručuju se okrivljenom.

(2) Prekršajni nalog može se uručiti okrivljenom:

a) lično;

b) poštom; ili

c) pričvršćivanjem ili ostavljanjem prekršajnog naloga na sigurnom i vidnom mjestu na motornom vozilu, ako se prekršaj koji je počinjen odnosi na nepropisno parkiranje motornog vozila.

(3) Kada je prekršajni nalog uručen lično, datum uručenja je datum kada ga je okrivljeni primio. Kada je prekršajni nalog uručen poštom, smatrat će se da je dostavljanje izvršeno po proteku pet radnih dana **ako se uručenje vrši u Bosni i Hercegovini i 10 radnih dana ako se uručenje vrši van teritorije Bosne i Hercegovine**, nakon što ga je ovlašteni organ predao na poštu. Kada je prekršajni nalog ostavljen na motornom vozilu, datum uručenja je datum kada je ostavljen na motornom vozilu.

Član 30.

(Prihvatanje odgovornosti)

(1) U svim slučajevima okrivljeni može prihvatiti odgovornost za prekršaj tako što će platiti kaznu i sve druge obaveze koje su utvrđene prekršajnim nalogom u određenom roku, ili obavijestiti ovlašteni organ o svom prihvatanju sankcije koja je određena u prekršajnom nalogu, ukoliko je prekršajnim nalogom specificirano da je takvo obavještenje prihvatljiva alternativa. Svako lice koje prihvati odgovornost u skladu s ovim članom ne može kasnije odbijati odgovornost ili se žaliti na visinu kazne ili vrstu bilo koje sankcije ili troškova.

(2) Ako lice prihvati odgovornost za prekršaj i u roku od osam dana od dana prijema prekršajnog naloga plati polovinu od punog iznosa izrečene novčane kazne utvrđene prekršajnim nalogom, oslobađa se plaćanja druge polovine izrečene novčane kazne.

Član 31.

(Propuštanje)

(1) Ukoliko je prekršajni nalog pravilno dostavljen u skladu s odredbama člana 29. ovog Zakona i ako okrivljeni u roku koji je određen u prekršajnom nalogu ne prihvati odgovornost za prekršaj u skladu s odredbama člana 30. ovog Zakona ili ne zatraži odlučivanje o predmetu pred sudom, smatrat će se da je okrivljeni prihvatio odgovornost propuštanjem, i prekršajni nalog postat će konačan i izvršan.

(2) Kada je novčana kazna određena zbog propuštanja u skladu s ovim članom, ovlašteni organ koji je izdao prekršajni nalog odredit će dodatnu taksu za naplatu u iznosu od 20,00 KM.

(3) U slučaju kada je prekršajni nalog uručen u skladu s članom 29. stav (2) tačka c) ovog Zakona, ovlašteni organ obavijestit će vlasnika vozila ličnim uručenjem ili poštom da takav prekršajni nalog postaje konačan i izvršan u roku od 10 dana od datuma obavještanja.

Član 32.

(Postupak po zahtjevu za odlučivanje pred sudom)

(1) Okrivljeni koji primi prekršajni nalog i želi da se o predmetu odluči pred sudom mora da:

a) zatraži sudsko odlučivanje tako što će na odgovarajućem mjestu potpisati jednu kopiju prekršajnog naloga i dostaviti je sudu u roku određenom u prekršajnom nalogu, i

b) se pojavi pred sudom na dan i u vrijeme određeno za usmeni pretres po prekršajnom nalogu, ili, ako datum nije naveden, onda na dan koji je sud odredio za usmeni pretres.

(2) Ako okrivljeni zahtijeva sudsko odlučivanje, sankcije određene u prekršajnom nalogu smatrat će se ništavnim. Sud može izreći bilo koju sankciju koju zakon dozvoljava, uključujući i strožiju sankciju.

Član 33.

(Lica koja nemaju prebivalište u Bosni i Hercegovini)

Okrivljenom koji nema prebivalište u Bosni i Hercegovini, a koji primi prekršajni nalog, može se ponuditi mogućnost da plati novčanu kaznu u najbližoj policijskoj stanici ili u kancelariji ovlaštenog organa. Ukoliko okrivljeni ne plati novčanu kaznu **i troškove platnog prometa**, smatrat će se da je podnio zahtjev za sudsko rješavanje i tada predstavnik ovlaštenog organa može odmah izvesti okrivljenog pred nadležni sud. Ukoliko nije moguće okrivljenog odmah izvesti pred sud, tada predstavnik ovlaštenog organa može preduzeti one radnje kojima bi se osiguralo njegovo pojavljivanje, u skladu s članom 6. ovog Zakona.

V. ZAHTJEV ZA POKRETANJE PREKRŠAJNOG POSTUPKA

Član 34.

(Podnošenje zahtjeva za pokretanje prekršajnog postupka)

U slučajevima kada nije moguće izdati prekršajni nalog, ovlašteni organ može pokrenuti prekršajni postupak protiv okrivljenog podnošenjem zahtjeva za pokretanje prekršajnog postupka nadležnom sudu.

Član 35.

(Sadržaj zahtjeva za pokretanje prekršajnog postupka)

(1) Zahtjev za pokretanje prekršajnog postupka treba biti na standardnom obrascu koji propisuje ministar pravde Bosne i Hercegovine i sadrži sljedeće podatke:

- a) naziv ovlaštenog organa koji podnosi zahtjev;
- b) prekršaj koji se okrivljenom stavlja na teret i naziv i član propisa koji propisuje prekršaj;
- c) kada je okrivljeni fizičko lice - ime i prezime, i ukoliko je poznata, stalnu adresu, jedinstveni matični broj, kao i mjesto zaposlenja, a za strance i broj pasoša;
- d) kada je okrivljeni pravno lice - naziv i sjedište, kao i jedinstveni identifikacioni broj;
- e) činjenični opis radnji koji određuje pravnu kvalifikaciju prekršaja, mjesto, datum i vrijeme počinjenja prekršaja i druge okolnosti neophodne za određivanje prekršaja;
- f) procijenjenu visinu naknade štete i druge troškove;
- g) prijedlog dokaza koji treba da se izvedu; i
- h) potpis ovlaštenog prestavnika ovlaštenog organa.

(2) Podnosilac zahtjeva jednu kopiju zahtjeva dostavlja sudu, a drugu kopiju dostavlja okrivljenom, lično ili poštom.

(3) Podnosilac zahtjeva može odustati od zahtjeva za pokretanje prekršajnog postupka sve do donošenja rješenja o prekršaju.

(4) Ako je zahtjev nerazumljiv ili ne sadrži sve što je potrebno da bi se po njemu moglo postupiti, sud će pozvati podnosioca da u određenom roku, a najkasnije u roku od osam dana, ispravi, odnosno dopuni zahtjev, a ako to ne učini, zahtjev će biti odbačen. U pozivu za ispravku, odnosno dopunu podneska podnosilac će se upozoriti na posljedice propuštanja.

Član 36.

(Sporazum o sankciji)

(1) Ovlašteni organ uz zahtjev za pokretanje prekršajnog postupka može priložiti ponudu okrivljenom da prihvati predloženu sankciju, koja može biti novčana kazna i/ili predložene zaštitne mjere. Ako okrivljeni prihvati predloženu sankciju ili ako se ovlašteni organ i okrivljeni sporazumiju o drugoj sankciji prije donošenja odluke o prekršaju, ovlašteni organ podnijet će sudu na odobrenje pisani sporazum koji sadrži detalje o sankciji, potpisan od okrivljenog i ovlaštenog predstavnika ovlaštenog organa. U opravdanim slučajevima sporazumom o sankciji može se predvidjeti i plaćanje novčane kazne u ratama u roku do šest mjeseci. Sud će odobriti sporazum između okrivljenog i ovlaštenog organa, ako utvrdi da on ispunjava zakonske uvjete.

(2) Za sve što nije regulirano ovim članom, analogno se primjenjuju odredbe člana 231. Zakona o krivičnom postupku.

(3) Sporazum o sankciji koji sud odobri može izvršiti ovlašteni organ u skladu s odredbama Poglavlja VII. ovog Zakona.

VI. EVIDENCIJA I BRISANJE SANKCIJA

Član 37.

(Vođenje evidencije)

(1) Sud koji donosi rješenje o prekršaju i ovlašteni organ koji izda prekršajni nalog će bez odgađanja u elektronskoj formi unijeti u prekršajnu evidenciju podatke o sankcijama koje su izrečene fizičkom, pravnom i odgovornom licu.

(2) Sud koji primi zahtjev za sudsko odlučivanje će, u skladu s članom 31. ovog Zakona, taj podatak bez odgađanja u elektronskoj formi unijeti u prekršajnu evidenciju i brisati sankcije izrečene odnosnim prekršajnim nalogom.

(3) Sud koji primi zahtjev za pokretanje prekršajnog postupka će, u skladu s članom 34. ovog zakona, taj podatak u elektronskoj formi unijeti u prekršajnu evidenciju.

(4) Novčana kazna neće se brisati iz prekršajne evidencije dok se vodi kao dug u Registru novčanih kazni, u skladu s članom 39. ovog Zakona. Zaštitne mjere neće se brisati iz prekršajne evidencije dok se ne izvrše ili dok ne istekne rok zastarijevanja.

(5) Posebnim zakonom mogu se propisati duži rokovi za brisanje sankcija iz prekršajne evidencije.

(6) Pravilnik o sadržaju i načinu vođenja prekršajne evidencije donosi ministar pravde Bosne i Hercegovine.

(7) Ovlaštena tijela iz člana 3. stav (1) tačka a) ovog zakona mogu voditi vlastitu prekršajnu evidenciju, a sama propisuju sadržaj i način vođenja te evidencije, u skladu ovog Zakona i Zakona o zaštiti osobnih podataka ("Službeni glasnik BiH", br. 49/06, 76/11 i 89/11).

Član 38.

(Brisanje sankcija)

(1) Kažnjavanje pravnog lica, fizičkog lica i odgovornog lica novčanom kaznom briše se iz evidencije *ex lege* ako kažnjeno pravno lice, fizičko lice i odgovorno lice u roku od dvije godine od dana pravosnažnosti odluke kojom je izrečena kazna ne počini novi prekršaj.

(2) Pravnom licu, fizičkom licu i odgovornom licu koje je više puta bilo kažnjeno za prekršaj brisat će se ranije kazne ako u roku od dvije godine od dana pravosnažnosti odluke kojom je izrečena posljednja kazna ne počini novi prekršaj.

Član 39.

(Davanje podataka iz evidencije)

(1) Podaci iz evidencije za kažnjena lica mogu se dati samo ako za to postoje opravdani razlozi.

(2) Podaci iz evidencije za kažnjena lica mogu se dati samo drugom sudu, nadležnom tužilaštvu, organima unutrašnjih poslova i organima inspekcije, u vezi s krivičnim postupkom ili postupkom za prekršaj koji se vodi protiv lica koje je ranije bilo kažnjavano za prekršaj, organima nadležnim za izvršenje sankcija za prekršaje ili nadležnim organima koji učestvuju u postupku brisanja kazne.

(3) Na obrazložen zahtjev nadležnog organa vlasti ili lica mogu se dati podaci iz evidencije za kažnjeno lice ako još traju određene pravne posljedice kazne ili zaštitne mjere ili ako za to postoji opravdan interes zasnovan na zakonu.

(4) Ako je odluka o kazni brisana, podaci o toj odluci nikom se ne daju osim sudu, nadležnom tužilaštvu u vezi s postupkom za prekršaj koji se vodi protiv lica čija je odluka brisana.

(5) Niko nema pravo tražiti od građana da podnesu dokaze o svojoj osuđivanosti ili neosuđivanosti za prekršaje.

(6) Građanima se na njihov zahtjev mogu davati podaci o njihovom kažnjavanju ili nekažnjavanju za prekršaje.

VII. IZVRŠENJE KAZNI

Član 40.

(Unos podataka o kaznama u Registar novčanih kazni)

(1) Sve novčane kazne i troškovi postupka koji su izrečeni na osnovu konačnog i izvršnog prekršajnog naloga ili pravosnažnog i izvršnog rješenja o prekršaju bit će upisani u Registar novčanih kazni i evidentirani kao dug koji kažnjeni duuguje odgovarajućem nivou vlasti kome se kazna plaća.

(2) Novčane kazne i troškovi postupka evidentiraju se kao dug u Registru novčanih kazni dok kažnjeni ne plati puni iznos novčane kazne i troškova postupka. Novčana kazna i troškovi postupka će u svakom slučaju biti brisani iz Registra novčanih kazni nakon proteka pet godina od dana kada su prekršajni nalog ili rješenje o prekršaju postali konačni i izvršni.

Član 41.

(Posljedice upisa kazne u Registar novčanih kazni)

(1) Dok se ne plate sve novčane kazne i troškovi koji su evidentirani u Registru novčanih kazni, kažnjenom se neće dozvoliti:

- a) registracija ili produženje važenja registracije motornog vozila;
- b) izdavanje ili produženje važenja vozačke dozvole;
- c) učešće na javnom tenderu; ili
- d) promjena registracije pravnog lica ili registracije samostalne zanatske djelatnosti.

Član 42.

(Izvršenje prekršajnih sankcija i postupak prinudne naplate)

- (1) Svaki ovlašteni organ odgovoran je za praćenje izvršenja novčanih kazni i drugih mjera izrečenih prekršajnim nalogom ili putem sporazuma o sankciji.
- (2) Sudovi će pratiti izvršenje novčanih kazni i drugih mjera izrečenih rješenjem o prekršaju.
- (3) Ako pravno lice prestane postojati nakon pravosnažnosti odluke o prekršaju, prekršajne sankcije izvršit će se u odnosu na pravnog sljednika. O izvršenju prekršajne sankcije protiv pravnog sljednika sud će donijeti posebno rješenje protiv kojeg je dozvoljena žalba. Uložena žalba odgađa izvršenje rješenja
- (4) Ako se utvrdi da kažnjeni izbjegava platiti novčanu kaznu, ovlašteni organ ili sud mogu zatražiti od Poreske uprave Federacije Bosne i Hercegovine, Republike Srpske ili Brčko Distrikta Bosne i Hercegovine da primijeni postupak prinudne naplate koji je određen u odgovarajućem zakonu o poreskim upravama za bilo koji iznos evidentiran u Registru novčanih kazni, na isti način na koji je ovlaštena za naplatu poreskih obaveza. Poreska uprava može provesti takav postupak prinudne naplate bez potrebe da kažnjenom uruči nalog za plaćanje.
- (5) Ako je novčana kazna izrečena pravnom licu ili ako se utvrdi da je to efikasan način osiguranja naplate, sud koji je izrekao novčanu kaznu provest će direktno prinudnu naplatu blokiranjem računa pravnog lica u skladu s odredbama Zakona o izvršnom postupku.
- (6) Ako se utvrdi da za prekršaj indirektnih poreza kažnjeni izbjegava da plati novčanu kaznu ili mjeru naplate protuvrijednosti robe izrečene rješenjem suda, sud će od Uprave za indirektno oporezivanje zatražiti da provede postupak prinudne naplate po Zakonu o postupku prinudne naplate indirektnih poreza ("Službeni glasnik BiH", br. 89/05 i 62/11)."

Član 43.

(Lišavanje slobode zbog neplaćanja)

- (1) Kažnjeni koji u roku ne plati u potpunosti ili djelimično novčanu kaznu koja mu je određena rješenjem o prekršaju ili prekršajnim nalogom bit će prinuđen na plaćanje određivanjem lišavanja slobode, ako sud smatra da je to jedini razuman i efikasan način koji će primorati kažnjenog da plati iznos na koji je obavezan. O lišavanju slobode zbog neplaćanja sud odlučuje rješenjem koje se protiv kažnjenog može donijeti samo jedanput za odnosni prekršaj. Ovo lišavanje slobode može odrediti sud po službenoj dužnosti ili na prijedlog ovlaštenog organa ili poreske uprave (Federacije Bosne i Hercegovine, Republike Srpske ili Brčko Distrikta BiH). Sud će obavijestiti podnosioca prijedloga o svojoj odluci i o izvršenju lišavanja slobode.
- (2) Sud može odrediti lišavanje slobode do 15 dana. Vrijeme za koje je kažnjeni lišen slobode neće uticati na plaćanje iznosa koji duguje. Kažnjeni će biti odmah oslobođen nakon plaćanja punog iznosa novčane kazne.

(3) Lišavanje slobode po odredbama ovog člana ne može biti određeno kažnjenom koji može dokazati da nije u mogućnosti platiti novčanu kaznu.

(4) Protiv rješenja o lišavanju slobode kažnjeni može uložiti žalbu drugostepenom sudu u roku od osam dana od dana prijema rješenja o lišavanju slobode. Prvostepeni sud dužan je žalbu dostaviti drugostepenom sudu u roku od tri dana od dana prijema žalbe. Drugostepeni sud mora donijeti odluku po žalbi u roku od 15 dana od dana prijema spisa. žalba odgađa izvršenje.

(5) Prije početka izvršenja rješenja o lišavanju slobode, kažnjeni može sudu predložiti da obavlja poslove za opće dobro ili poslove za dobro lokalne zajednice, kao zamjenu za plaćanje novčane kazne. Sud će voditi listu takvih poslova u saradnji s nadležnim kompetentnim organima vlasti. Prilikom odlučivanja o prijedlogu, sud će razmotriti sve okolnosti slučaja, kao i finansijske uvjete i mogućnost kažnjelog da plati novčanu kaznu.

(6) Ukoliko sud usvoji prijedlog iz stava (5) ovog člana, izdat će nalog za obustavu izvršenja lišavanja slobode za vrijeme dok ne istekne rok za obavljanje takvog posla. Ukoliko kažnjeni obavi predviđeni posao, lišavanje slobode neće se izvršiti i novčana kazna brisat će se iz Registra novčanih kazni i neće biti naplaćena. Ukoliko kažnjeni uopće ne obavi predviđeni posao, rješenje o lišavanju slobode bit će izvršeno, a ako ga obavi samo djelimično, sud će cijeniti da li je svrsishodno izvršiti lišavanje slobode i o tome donijeti odgovarajući nalog.

VIII. OSTALE ODREDBE

Član 44.

(Prihod budžeta Bosne i Hercegovine)

(1) Novčane kazne i sredstva pribavljena prodajom oduzetih predmeta za prekršaje koji su propisani zakonima i drugim propisima Bosne i Hercegovine, prihod su budžeta Bosne i Hercegovine, a novčane kazne i sredstva pribavljena prodajom oduzetih predmeta za prekršaje propisane zakonima entiteta Republike Srpske i Federacije Bosne i Hercegovine, Brčko Distrikta Bosne i Hercegovine, kantona u Federaciji Bosne i Hercegovine, gradova i općina, prihodi su budžeta navedenih nivoa vlasti.

(2) Izuzetno od stava (1) ovog člana, novčane kazne i sredstva pribavljena prodajom oduzetih predmeta kao i sredstva od naplate protuvrijednosti robe, za prekršaje iz oblasti indirektnih poreza koji su propisani zakonima i drugim propisima Bosne i Hercegovine, prihod su Jedinственог računa za koji je odgovorna Uprava za indirektno oporezivanje.

(3) Izuzetno od stava (1) ovog člana, novčane kazne i sredstva pribavljena prodajom oduzetih predmeta za prekršaje koji su propisani Zakonom o osnovama sigurnosti saobraćaja na putevima u Bosni i Hercegovini i drugim propisima iz oblasti sigurnosti saobraćaja na putevima, prihod su budžeta onog nivoa vlasti iz kojeg se finansira ovlašteno tijelo koje u okviru svoje nadležnosti osigurava njihovo provođenje.

Član 45.

(Troškovi prekršajnog postupka)

Troškovi vođenja prekršajnog postupka prihod su budžeta iz kojeg se finansira ovlašteni organ koji je izdao konačan prekršajni nalog, odnosno sud koji je izdao pravosnažno rješenje.

Član 46.

(Posredovanje)

Sud može predložiti posredovanje preko posrednika, ako bi to bilo svrsishodno s obzirom na sadržaj imovinskopravnog zahtjeva oštećenog.

Član 47.

(Obaveza pružanja pravne pomoći i ostvarivanja službene saradnje u postupku izvršenja prekršajnih sankcija)

U postupku izvršenja sankcija, sudovi i ostali ovlašteni organi dužni su uzajamno pružati pravnu pomoć i ostvarivati službenu saradnju u skladu sa Zakonom o pravnoj pomoći i službenoj saradnji u krivičnim stvarima između Federacije Bosne i Hercegovine, Republike Srpske i Brčko Distrikta Bosne i Hercegovine ("Službeni glasnik BiH", br.19/02), i s propisima koji reguliraju izvršenje prekršajnih sankcija.

IX. PRIJELAZNE I ZAVRŠNE ODREDBE

Član 48.


(Prestanak važenja ranijeg zakona)

Početak primjene ovog Zakona prestaje važiti Zakon o prekršajima Bosne i Hercegovine ("Službeni glasnik BiH", br. 20/04).

Član 49.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH", a primjenjivat će se od dana početka primjene entitetskih zakona o prekršajima.



ZAKON O PREKRŠAJIMA
(neslužbeni prečišćeni tekst)

I. OPĆE ODREDBE

Član 1.

(Predmet Zakona)

Ovim Zakonom propisuje se postupanje ovlaštenih organa u Bosni i Hercegovini kada odlučuju o prekršajima propisanim zakonima i drugim propisima institucija Bosne i Hercegovine i nadležnost i postupanje sudova u Federaciji Bosne i Hercegovine, Republici Srpskoj i Brčko Distriktu Bosne i Hercegovine (u daljnjem tekstu: sudovi), radi odlučivanja o prekršajima propisanim zakonima i drugim propisima institucija Bosne i Hercegovine.

Član 2.

(Definicija prekršaja)

- (1) Prekršaji predstavljaju kršenja javnog poretka ili propisa o ekonomskom i finansijskom poslovanju, utvrđena zakonom ili drugim propisom, za koje su određena obilježja prekršaja i za koje su propisane sankcije.
- (2) Prekršaj može biti počinjen činjenjem ili nečinjenjem.
- (3) Nehat izvršioca dovoljan je da se izvršilac smatra odgovornim za prekršaj, osim ako je odredbama o prekršajima propisano da će biti kažnjen za djelo počinjeno isključivo s umišljajem.
- (4) Prekršaj mogu počiniti fizička i pravna lica.
- (5) Pokušaj počinjenja prekršaja nije kažnjiv.

Član 3.

(Značenje izraza)

- (1) Posebni izrazi u smislu ovog Zakona imaju sljedeće značenje:

a) *Ovlašteni organ* je:

1) nadležni policijski organ Bosne i Hercegovine, Federacije Bosne Hercegovine, Republike Srpske, Brčko Distrikta Bosne i Hercegovine ili kantona;

2) inspektor ili lice ovlašteno za obavljanje inspekcije; ili

3) ministarstvo, preduzeće ili drugo pravno lice koje ima javna ovlaštenja i u čiju nadležnost spada direktno ili indirektno provođenje bilo kojeg zakona ili propisa koji propisuje prekršaje.

b) *Registar novčanih kazni* je baza podataka o novčanim kaznama za prekršaje kao što je propisano u Zakonu o centralnoj evidenciji i razmjeni podataka Bosne i Hercegovine.

c) *Okrivljeni* je pravno ili fizičko lice protiv kojeg je pokrenut prekršajni postupak.

d) *Oštećeni* je pravno ili fizičko lice koje je pretrpjelo štetu koja je na bilo koji način nastala činjenjem prekršaja.

e) *Sud* je prvostepeni i drugostepeni sud nadležan da odlučuje o prekršajnim predmetima u skladu sa zakonima o sudovima u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

f) *Kažnjeni* je lice za koje je konačnim prekršajnim nalogom ili pravosnažnim rješenjem o prekršaju ustanovljeno da je odgovorno za određeni prekršaj.

g) Uručenje poziva poštom je uručenje putem preporučene pošte na adresu fizičkog lica, koja se nalazi u Evidenciji prebivališta i boravišta građana Bosne i Hercegovine, koju u okviru svoje nadležnosti vodi Agencija za identifikacione dokumente, evidenciju i razmjenu podataka Bosne i Hercegovine ili na registriranu adresu domaćeg pravnog lica ili predstavništva stranog lica u Bosni i Hercegovini.

(2) Upotreba muškog ili ženskog roda podrazumijeva uključivanje oba roda.

(3) Izrazi navedeni u članu 1. Krivičnog zakona Bosne i Hercegovine (u daljnjem tekstu: Krivični zakon) koristit će se u ovom Zakonu, ukoliko se kontekstom jasno ne zahtijeva drugačije.

Član 4.

(Propisivanje prekršaja)

Prekršaji se propisuju zakonima Bosne i Hercegovine i odlukama Vijeća ministara Bosne i Hercegovine (u daljnjem tekstu: zakoni i drugi propisi Bosne i Hercegovine).

Član 5.

(Prava lica okrivljenih za prekršaje)

(1) Svako ko je okrivljen da je počinio prekršaj ima pravo zahtijevati da o njegovoj odgovornosti za počinjeni prekršaj odluči sud ukoliko je zahtjev podnesen u roku koji je propisan zakonom. Takva lica imaju pravo da:

- a) se smatraju nevinim dok se ne dokaže njihova odgovornost u skladu sa zakonom;
- b) u najkraćem roku budu obaviješteni, detaljno i na jeziku koji razumiju, o prirodi i razlogu optužbi protiv njih;
- c) im se da odgovarajuće vrijeme i mogućnosti za pripremu njihove odbrane;
- d) se brane lično ili uz pomoć branioca po vlastitom izboru, ili ukoliko nemaju dovoljno sredstava, da im se branilac osigura besplatno kada to zahtijevaju interesi pravde;
- e) ispitaju ili da se u njihovo ime ispitaju svjedoci koji ih terete i da se osigura prisustvo i saslušanje svjedoka u njihovu korist pod istim uvjetima kao i svjedoka koji ih terete i
- f) dobiju besplatnu pomoć prevodioca ako ne razumiju jezik koji se upotrebljava na sudu.

Član 6.

(Lišavanje slobode i garancija kao osiguranje prisustva i plaćanja novčane kazne)

(1) Policijski službenik ili ovlašteno službeno lice može lišiti slobode lice koje je osumnjičeno za počinjenje prekršaja, ali je dužno takvo lice odmah, a najkasnije u roku od 12 sati, izvesti pred sud, kako bi se osiguralo njegovo prisustvo na sudu u slučaju kada:

- a) lice odbije ili nije u mogućnosti otkriti svoj identitet; ili
- b) lice nije nastanjeno u Bosni i Hercegovini ili privremeno boravi u inozemstvu, a postoji sumnja da može pobjeći kako bi izbjeglo odgovornost za prekršaj ili
- c) postoji opasnost da će lice nastaviti s činjenjem prekršaja ili ponovo počiniti istovrsni prekršaj.

(2) Sud mora ispitati okrivljenog odmah, a najkasnije u roku od 12 sati.

(3) Svako lišavanje slobode može biti određeno samo ako se isti cilj ne može ostvariti drugom mjerom i mora biti razumno i u skladu s prirodom počinjenog prekršaja, a mora se voditi računa o starosti i drugim ličnim svojstvima tog lica, tako da dužina trajanja lišavanja slobode odgovara okolnostima. Svako lice lišeno slobode u skladu s odredbama ovog člana mora biti u najkraćem roku obaviješteno, detaljno i na jeziku koji razumije, o razlozima za lišavanje slobode, kao i o prekršaju koji mu se stavlja na teret.

(4) Radi osiguranja prisustva pred sudom, policija ili drugi ovlašteni organ može zahtijevati od lica koje je okrivljeno za prekršaj, a koje nema prebivalište u Bosni i Hercegovini ili koje privremeno boravi u inozemstvu i želi da napusti Bosnu i Hercegovinu prije okončanja postupka, a za koje postoji sumnja da može pobjeći kako bi izbjeglo odgovornost za prekršaj, da preda svoj pasoš ili drugi identifikacioni dokument do pojavljivanja na sudu, ali ne duže od 72 sata. Uz prekršajni nalog ili zahtjev za pokretanje prekršajnog postupka sudu će se predati i pasoš ili drugi identifikacioni dokument.

(5) Radi osiguranja plaćanja novčane kazne, licu koje je okrivljeno za prekršaj koje nema prebivalište u Bosni i Hercegovini ili koje privremeno boravi u inozemstvu, a želi napustiti Bosnu i Hercegovinu prije okončanja postupka, a za koje postoji sumnja da može pobjeći kako bi izbjeglo odgovornost za prekršaj, sudija može naložiti da položi novčanu garanciju u visini maksimalne kazne koja može biti izrečena za takav prekršaj.

Član 7.

(Primjena prekršajnog zakonodavstva Bosne i Hercegovine)

Prekršajno zakonodavstvo Bosne i Hercegovine primjenjuje se prema svakome ko počini prekršaj na teritoriji Bosne i Hercegovine, ili na njenom plovilu ili civilnom zrakoplovu bez obzira gdje se nalazi u vrijeme počinjenja.

Član 8.

(Propisi koji se primjenjuju)

(1) Postupajući po prekršajima propisanim zakonom ili drugim propisom Bosne i Hercegovine, sudovi primjenjuju odgovarajući zakon o prekršajima koji je u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine, te primjenjuju materijalnopravne propise i krivične odredbe zakona ili propisa Bosne i Hercegovine koji propisuju prekršaj.

(2) Na sva opća materijalnopravna pitanja prekršajnog zakonodavstva, koja nisu propisana Poglavljem II ovog Zakona, primjenjuje se zakon o prekršajima koji je u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine, kao primjenjivo pravo suda koji vodi postupak.

Član 9.

(Stvarna nadležnost)

Za postupanje po prekršajima propisanim zakonima i drugim propisima Bosne i Hercegovine stvarno su nadležni sudovi u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 10.

(Mjesna nadležnost)

(1) Za vođenje prekršajnog postupka mjesno je nadležan sud na čijem je području prekršaj izvršen.

(2) Ako je očito da će se postupak provesti lakše ili da će troškovi postupka biti manji ili ako za to postoje drugi opravdani razlozi, postupak se može provesti i pred sudom na čijem je području počinilac otkriven ili uhvaćen ili pred drugim sudom.

Član 11.

(Posebna mjesna nadležnost)

Ako je prekršaj počinjen na plovilu ili zrakoplovu Bosne i Hercegovine, za vođenje prekršajnog postupka mjesno je nadležan sud na čijem se području nalazi domaća luka u kojoj se završava putovanje počinioca prekršaja, a ako je počinilac prekršaja član posade plovila ili zrakoplova, sud na čijem se području nalazi matična luka plovila ili zrakoplova.

Član 12.

(Pomoćna nadležnost)

Ako se mjesna nadležnost suda ne može odrediti prema mjestu izvršenja prekršaja, mjesno je nadležan sud na čijem području počinilac ima prebivalište ili boravište, odnosno sud na čijem području je sjedište domaćeg pravnog lica ili predstavništva stranog lica u Bosni i Hercegovini.

Član 13.

(Nadležnost suda pred kojim je ranije pokrenut postupak)

Ako bi, prema odredbama čl. 10. i 11. ovog Zakona, istovremeno bila nadležna dva ili više sudova, nadležan je sud pred kojim je ranije pokrenut postupak, ali će svaki sud na svom području preduzeti radnje koje ne trpe odgađanje.

Član 14.

(Nadležnost za saučesnike i spajanje i razdvajanje postupka)

- (1) Sud, koji je nadležan za počinioca, nadležan je i za saučesnike.
- (2) Za počinioca i saučesnike provest će se jedan postupak, ali se iz važnih razloga postupci protiv pojedinih saučesnika mogu razdvojiti i provesti odvojeno.
- (3) Kada se pokreću ili vode postupci protiv istog lica za više prekršaja ili protiv više lica za isti prekršaj, na spajanje i razdvajanje postupka primjenjuju se odredbe zakona o prekršajima koji su u primjeni u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 15.

(Sukob nadležnosti)

Sukob nadležnosti za vođenje prekršajnog postupka i odlučivanje o prekršajnim predmetima rješava se u skladu sa zakonima o sudovima u Federaciji Bosne i Hercegovine, Republici Srpskoj i Brčko Distriktu Bosne i Hercegovine.

Član 15a.

(Prekršajna odgovornost pravnih lica i odgovornih lica u pravnim licima)

- (1) Ovim zakonom uređuje se prekršajna odgovornost pravnih lica i odgovornih lica u pravnim licima.
- (2) Prekršajna odgovornost pravnog lica prestaje prestankom njegovog postojanja, a u slučaju postojanja njegovog pravnog sljednika, za prekršaj odgovara njegov sveukupni pravni sljednik. Ako je sljednika više, sud će utvrditi koji od njih, s obzirom na prirodu sljedništva, odgovara za prekršaj.
- (3) Odredbe ovog zakona kao i drugih propisa koji se odnose na prekršajnu odgovornost pravnog lica i u njemu odgovornih lica primjenjuju se i na s njima izjednačene subjekte: predstavništva i poslovne jedinice domaćih i stranih lica, druge subjekte koji nemaju pravnu sposobnost, ali samostalno nastupaju u pravnom prometu, te na odgovorna lica u tim subjektima.

Član 15b.

(Osnova odgovornosti pravnog lica i odgovornog lica u pravnom licu)

- (1) Pravno lice i odgovorno lice u pravnom licu prekršajno su odgovorni za povrede propisa o prekršaju.
- (2) Propisom o prekršaju može se za prekršaj propisati prekršajna odgovornost samo pravnog lica.
- (3) Sud će utvrditi prekršajno odgovornim pravno lice i u slučaju kada se utvrdi postojanje pravnih ili stvarnih prepreka za utvrđivanje odgovornosti odgovornog lica ili se ne može utvrditi ko je odgovorno lice.

Član 15c.

(Odgovorno lice)

- (1) Odgovorno lice u smislu ovog zakona je fizičko lice koje vodi poslove pravnog lica ili mu je povjereno obavljanje određenih poslova iz oblasti djelovanja pravnog lica.
- (2) Propisom o prekršaju može se propisati koje odgovorno lice u pravnom licu odgovara za određeni prekršaj.
- (3) Odgovorno lice prekršajno odgovara za počinjeni prekršaj i u slučaju ako nakon počinjenja prekršaja prestane raditi u pravnom licu ili ako je nakon počinjenja prekršaja pravno lice prestalo postojati.

Član 15d.

(Isključenje i ograničenje odgovornosti pravnih lica)

- (1) Bosna i Hercegovina, Federacija Bosne i Hercegovine, Republika Srpska, Brčko Distrikt Bosne i Hercegovine i kanton ne mogu prekršajno odgovarati.

(2) Jedinice lokalne samouprave odgovaraju za prekršaje koji su počinjeni radnjama koje ne ulaze u izvršavanje njihovih javnih ovlaštenja.

(3) Isključenje odgovornosti Bosne i Hercegovine, Federacije Bosne i Hercegovine, Republike Srpske, Brčko Distrikta Bosne i Hercegovine, kantona i jedinica lokalne samouprave prema st. (1) i (2) ovog člana ne isključuje mogućnost prekršajne odgovornosti odgovornog lica za taj prekršaj u organima iz st. (1) i (2) ovog člana.

Član 16.

(Primjena odredbi Krivičnog zakona i Zakona o krivičnom postupku)

(1) Ukoliko nije drugačije propisano odredbama ovog Zakona, sljedeće odredbe Krivičnog zakona Bosne i Hercegovine ("Službeni glasnik BiH", br. 3/03, 32/03, 37/03, 54/04, 61/04, 30/05, 53/06 i 55/06) će se *mutatis mutandis* primjenjivati na prekršaje: "Nužna odbrana" i "Krajnja nužda"; "Saučesnici"; "Podstrekavanje"; "Pomaganje"; "Granice krivične odgovornosti i kažnjivosti saučesnika"; "Uračunljivost"; "Umišljaj"; "Nehat"; "Stvarna zabluda"; "Pravna zabluda" i "Odgovornost pravnih lica".

(2) Ukoliko nije drugačije propisano odredbama ovog Zakona, sljedeće odredbe Zakona o krivičnom postupku Bosne i Hercegovine ("Službeni glasnik BiH", br. 3/03, 32/03, 36/03, 26/04, 63/04, 13/05, 48/05, 46/06 i 76/06 - u daljnjem tekstu: Zakon o krivičnom postupku) će se *mutatis mutandis* primjenjivati u prekršajnom postupku: "Osnovni principi"; "Nadležnost suda"; "Izuzeće"; "Branilac"; "Pretnos stana i drugih prostorija i lica"; "Privremeno oduzimanje predmeta i imovine"; "Ispitivanje osumnjičenog"; "Saslušanje svjedoka"; "Uviđaj i rekonstrukcija"; "Vještačenje"; "Podnesci i zapisnici"; "Rokovi"; "Troškovi krivičnog postupka"; "Imovinskopравни zahtjevi"; "Glavni pretres"; "žalba na prvostepenu presudu"; "Ponavljanje postupka"; "Postupak prema maloljetnicima" i "Postupak za primjenu mjera sigurnosti, za oduzimanje imovinske koristi pribavljene krivičnim djelom i za opozivanje uvjetne osude".

(3) U slučaju bilo kakvih nesaglasnosti između odredbi Krivičnog zakona iz stava (1) ovog člana i odredbi Zakona o krivičnom postupku iz stava (2) ovog člana i ovog Zakona, primjenjivat će se odredbe ovog Zakona. Upućivanje na odredbe Zakona o krivičnom postupku koje se odnose na tužioca će se na odgovarajući način primjenjivati na svaki ovlašteni organ.

II. MATERIJALNOPRAVNE ODREDBE

Član 17.

(Vrijeme i mjesto počinjenja prekršaja)

(1) Prekršaj je počinjen u vrijeme kada je počinilac radio ili bio dužan raditi, bez obzira kada je posljedica činjenja ili propuštanja nastupila.

(2) Prekršaj je počinjen kako u mjestu gdje je počinilac radio ili bio dužan raditi, tako i u mjestu gdje je posljedica njegovog činjenja ili propuštanja potpuno ili djelimično nastupila.

(3) Prekršaj je, u slučaju saučesništva, počinjen u mjestu određenom u stavu (2) ovog člana i u mjestu gdje je učesnik radio ili bio dužan raditi ili u mjestu gdje je, prema očekivanju učesnika, posljedica njegovog činjenja ili propuštanja trebalo da nastupi.

Član 18.

(Vrste sankcija)

(1) Sljedeće sankcije mogu biti izrečene licu odgovornom za počinjeni prekršaj:

- a) novčana kazna;
- b) uvjetna osuda;
- c) ukor; i
- d) zaštitne mjere.

(2) Sljedeće mjere mogu biti izrečene kao posljedica odgovornosti za počinjeni prekršaj:

- a) oduzimanje imovinske koristi;
- b) obaveza naknade štete;
- c) kazneni poeni; i
- d) lišavanje slobode radi naplate novčane kazne.

Član 19.

(Novčana kazna)

- (1) Novčana kazna može se propisati u određenom rasponu ili u fiksnom iznosu.
- (2) Fizičkom licu može se propisati novčana kazna u najmanjem iznosu od 30,00 KM, odgovornom licu u pravnom licu u najmanjem iznosu od 50,00 KM, a pravnom licu u najmanjem iznosu od 500,00 KM.
- (3) Zakonom se može propisati fizičkom licu novčana kazna u najvećem iznosu od 10.000,00 KM, odgovornom licu u pravnom licu novčana kazna u najvećem iznosu od 20.000,00 KM, a pravnom licu novčana kazna u najvećem iznosu od 200.000,00 KM.
- (4) Drugim propisom može se propisati fizičkom licu novčana kazna u najvećem iznosu od 3.000,00 KM, odgovornom licu u pravnom licu novčana kazna u najvećem iznosu od 5.000,00 KM, a pravnom licu novčana kazna u najvećem iznosu od 10.000,00 KM.
- (5) Za prekršaj, koji počinji pojedinac obavljajući samostalnu poslovnu djelatnost, zakonom se može propisati novčana kazna u najvećem iznosu od 20.000,00 KM, a drugim propisom novčana kazna u najvećem iznosu od 6.000,00 KM.
- (6) Za prekršaj iz oblasti poreza i carina, novčane kazne mogu se propisati u višestrukom iznosu poreske ili carinske obaveze koja je trebalo da bude plaćena, ili kao procenat ili višestruki iznos vrijednosti robe koja je predmet prekršaja, ali ne u iznosu većem od 200.000,00 KM.

Član 20.

(Zaštitne mjere)

- (1) Zaštitne mjere mogu se propisati samo zakonom.
- (2) Za prekršaj se mogu propisati sljedeće zaštitne mjere:
 - a) oduzimanje predmeta;
 - b) zabrana obavljanja poziva, djelatnosti ili dužnosti;
 - c) potpuna ili djelimična zabrana upravljanja motornim vozilom i
 - d) vanbolničko liječenje od ovisnosti.
- (3) Zakonima koji propisuju prekršaje se mogu odrediti dodatne vrste zaštitnih mjera.

Član 21.

(Sticaj)

- (1) Ukoliko okrivljeni, jednom ili sa više radnji, počinji više prekršaja, novčana kazna bit će utvrđena za svaki pojedini prekršaj, a onda će se izreći jedinstvena novčana kazna na osnovu tako utvrđenih novčanih kazni.
- (2) Izrečena jedinstvena novčana kazna iz stava (1) ovog člana mora biti veća od svake pojedine utvrđene novčane kazne, ali ne smije preći zbir utvrđenih novčanih kazni.

Član 22.

(Zastarjelost pokretanja i vođenja postupka)

- (1) Za prekršaj propisan zakonom ili drugim propisom Bosne i Hercegovine prekršajno gonjenje ne može se preduzeti kada od izvršenja prekršaja protekne:

a) za prekršaje za koje je propisana novčana kazna u iznosu do 3.000,00 KM kad protekne jedna godina od dana kada je prekršaj izvršen;

b) za prekršaje za koje je propisana novčana kazna u iznosu većem od 3.000,00 KM kad proteknu dvije godine od dana kada je prekršaj izvršen.

(2) Zakonom se mogu za određene prekršaje u oblasti poreza, carina, finansija, rada i zaštite na radu odrediti duži rokovi od rokova iz stava (1) ovog člana, ali ne duži od tri godine.

Član 23.

(Zastarjelost izvršenja zaštitnih mjera)

Zaštitna mjera neće se izvršiti kada protekne jedna godina od dana konačnosti prekršajnog naloga, odnosno pravosnažnosti rješenja kojim je izrečena.

Član 24.

(Izvršenje zaštitne mjere javnog objavljivanja odluke)

Zaštitna mjera javnog objavljivanja odluke suda izvršava se u sredstvima javnog informiranja dostupnim na cijeloj teritoriji Bosne i Hercegovine.

Član 25.

(Tok i prekid zastarjelosti)

(1) Zastarjelost za pokretanje i vođenje prekršajnog postupka počinje teći od dana kada je prekršaj izvršen, a zastarjelost za izvršenje zaštitne mjere od dana konačnosti prekršajnog naloga, odnosno pravosnažnosti rješenja kojim je zaštitna mjera izrečena.

(2) Zastarjelost se prekida svakom radnjom ovlaštenog organa za postupak odnosno za izvršenje, preduzetom radi gonjenja izvršioca prekršaja, odnosno izvršenja zaštitne mjere.

(3) Svakim prekidom zastarjelost počinje ponovo teći, ali bez obzira na prekide, zastarjelost u svakom slučaju nastaje kada protekne dva puta onoliko vremena koliko je predviđeno u čl. 22. i 23. ovog Zakona.

III. PREKRŠAJNI POSTUPAK

Član 26.

(Prekršajni postupak)

(1) Prekršajni postupak može pokrenuti ovlašten organ na sljedeći način:

a) izdavanjem prekršajnog naloga; ili

b) podnošenjem zahtjeva za pokretanje prekršajnog postupka nadležnom sudu.

(2) Zahtjev za pokretanje prekršajnog postupka može se podnijeti samo u slučajevima kada ne postoje uvjeti za izdavanje prekršajnog naloga određeni u članu 27. ovog Zakona.

IV. PREKRŠAJNI NALOG

Član 27.

(Izdavanje prekršajnog naloga)

(1) Ovlašteni organ izdat će prekršajni nalog ukoliko ustanovi da je prekršaj iz njegove nadležnosti utvrđen na jedan od sljedećih načina:

a) neposrednim opažanjem ovlaštenog službenog lica prilikom inspekcije, nadzora i pregleda;

b) podacima koji su dobiveni uređajima za nadzor ili mjerenje;

c) prilikom inspeksijskog ili drugog nadzora pregledom dokumentacije, prostorija i robe ili na drugi zakonit način ili

d) na osnovu priznanja okrivljenog o izvršenju prekršaja u nekom drugom sudskom ili administrativnom postupku.

(2) Prekršajni nalog se može izdati samo u slučajevima kada odgovarajući zakon ili drugi propis određuje fiksnu novčanu kaznu, kada novčana kazna može biti izračunata korištenjem matematičke formule, ili kada ovlaštení organ odluči da izrekne minimalnu novčanu kaznu, odnosno zaštitnu mjeru u najkraćem trajanju ili zaštitnu mjeru oduzimanje predmeta određenu takvim zakonom ili drugim propisom.

(3) Ako okrivljeni izvrši više prekršaja u sticaju, tada ovlaštení organ može prekršajnim nalogom izreći jedinstvenu novčanu kaznu primjenom člana 21. ovog Zakona, a ako je za samo jedan od izvršenih prekršaja predviđena zaštitna mjera, može izreći i tu zaštitnu mjeru u najkraćem predviđenom trajanju.

(4) Ovlaštení organ koji je izdao prekršajni nalog može u svako vrijeme ispraviti greške u pisanju ili ostale očigledne greške, po službenoj dužnosti ili na prijedlog strana u postupku.

(5) Prekršajni nalog ne može biti izdat prema maloljetniku.

Član 28.

(Sadržaj prekršajnog naloga)

(1) Prekršajni nalog donosi se u pismenom obliku i mora sadržavati sljedeće podatke:

- a) naziv: prekršajni nalog;
- b) naziv ovlaštenog organa koji ga je izdao;
- c) ime i svojstvo službenog lica koje ga je izdalo;
- d) jedinstveni broj koji je odredio ovlaštení organ;
- e) datum izdavanja i datum uručenja kao što je određeno u članu 29. stav 3. ovog Zakona;
- f) prekršaj koji je počinio okrivljeni, naziv propisa i član koji određuje prekršaj;
- g) kada je okrivljeni fizičko lice - ime i prezime, i ukoliko je poznata, stalna adresa, jedinstveni matični broj, kao i mjesto zaposlenja, a za strance i broj pasoša;
- h) kada je okrivljeni pravno lice - naziv i sjedište, kao i jedinstveni identifikacioni broj za domaća pravna lica, a za strana lica naziv, sjedište i broj registra ili druge evidencije u državi sjedišta stranog lica, a ako strano lice ima predstavništvo u Bosni i Hercegovini, broj upisa u Registar predstavništava stranih lica u Bosni i Hercegovini;
- i) mjesto, datum i vrijeme kada je prekršaj počinjen;
- j) utvrđena sankcija, uključujući novčanu kaznu i/ili zaštitnu mjeru;
- k) iznos naknade štete, ukoliko se taj iznos može odrediti cjenovnikom i troškovi postupka ukoliko su određeni zakonom u fiksnom iznosu;
- l) uputstvo da se novčana kazna, šteta i troškovi trebaju platiti ili da okrivljeni mora zatražiti sudsko odlučivanje o prekršajnom nalogu u roku od osam dana od dana uručenja;
- m) uputstvo o načinu plaćanja novčane kazne, štete i troškova; i
- n) potpis ovlaštenog predstavnika ovlaštenog organa.

(2) Ukoliko je prekršaj počinjen u saobraćaju i uključuje motorno vozilo, prekršajni nalog treba da sadržava sljedeće dodatne podatke:

- a) registarski broj vozila i broj saobraćajne dozvole;
- b) broj vozačke dozvole vozača, ukoliko je poznat; i
- c) broj kaznenih poena koje zakon propisuje za takav prekršaj.

(3) Prekršajni nalog će, uz ostalo, sadržavati sljedeća uputstva:

- a) da okrivljeni ima pravo podnijeti zahtjev za sudsko odlučivanje o prekršajnom nalogu, naznačavajući kojem sudu i u kojem roku okrivljeni treba podnijeti zahtjev; i
- b) da kazna koju je izrekao sud može biti veća od one koja je izrečena prekršajnim nalogom;

c) da će okrivljeni biti dužan nadoknaditi sudske troškove u slučaju kada zatraži sudske odlučivanje o prekršajnom nalogu ukoliko sud utvrdi da je on odgovoran za prekršaj naveden u prekršajnom nalogu; i

d) da će u slučaju prekršaja iz oblasti saobraćaja za koje zakon propisuje dodjeljivanje kaznenih poena, prihvatanje odgovornosti ili utvrđivanje odgovornosti od suda rezultirati dodjeljivanjem tih kaznenih poena.

(4) Prekršajni nalog sadrži pouku da, ako lice protiv kojeg je izdat prekršajni nalog prihvati odgovornost i najkasnije u roku od osam dana od dana prijema prekršajnog naloga plati polovinu izrečene novčane kazne, oslobađa se plaćanja druge polovine izrečene novčane kazne

(5) Prekršajni nalog sadržavat će određeno mjesto na kojem će se okrivljeni potpisati u slučaju da zahtijeva sudske rješavanje u skladu s članom 32. ovog Zakona.

(6) Ukoliko postoji dogovor između ovlaštenog organa i suda, prekršajnim nalogom može se odrediti datum i vrijeme usmenog pretresa, koji ne može biti kraći od osam dana od datuma izdavanja prekršajnog naloga.

(7) Svaki ovlašten organ može imati svoj obrazac prekršajnog naloga. Obrazac takvog prekršajnog naloga treba odobriti Ministarstvo pravde Bosne i Hercegovine.

(8) Obrasci prekršajnog naloga koje su odobrila entitetska ministarstva pravde mogu se koristiti u primjeni ovog Zakona ukoliko sadrže elemente iz stavova od (1) do (4) ovog člana i ako Ministarstvo pravde Bosne i Hercegovine odobri njihovo korištenje.

Član 29.

(Uručenje prekršajnog naloga)

(1) Prekršajni nalog sastoji se od originala i najmanje dvije kopije. Original zadržava ovlašten organ u svojoj evidenciji. Dvije kopije uručuju se okrivljenom.

(2) Prekršajni nalog može se uručiti okrivljenom:

a) lično;

b) poštom; ili

c) pričvršćivanjem ili ostavljanjem prekršajnog naloga na sigurnom i vidnom mjestu na motornom vozilu, ako se prekršaj koji je počinjen odnosi na nepropisno parkiranje motornog vozila.

(3) Kada je prekršajni nalog uručen lično, datum uručenja je datum kada ga je okrivljeni primio. Kada je prekršajni nalog uručen poštom, smatrat će se da je dostavljanje izvršeno po proteku pet radnih dana nakon što ga je ovlašten organ predao na poštu. Kada je prekršajni nalog ostavljen na motornom vozilu, datum uručenja je datum kada je ostavljen na motornom vozilu.

Član 30.

(Prihvatanje odgovornosti)

(1) U svim slučajevima okrivljeni može prihvatiti odgovornost za prekršaj tako što će platiti kaznu i sve druge obaveze koje su utvrđene prekršajnim nalogom u određenom roku, ili obavijestiti ovlašten organ o svom prihvatanju sankcije koja je određena u prekršajnom nalogu, ukoliko je prekršajnim nalogom specificirano da je takvo obavještenje prihvatljiva alternativa. Svako lice koje prihvati odgovornost u skladu s ovim članom ne može kasnije odbijati odgovornost ili se žaliti na visinu kazne ili vrstu bilo koje sankcije ili troškova.

(2) Ako lice prihvati odgovornost za prekršaj i u roku od osam dana od dana prijema prekršajnog naloga plati polovinu od punog iznosa izrečene novčane kazne utvrđene prekršajnim nalogom, oslobađa se plaćanja druge polovine izrečene novčane kazne.

Član 31.

(Propuštanje)

(1) Ukoliko je prekršajni nalog pravilno dostavljen u skladu s odredbama člana 29. ovog Zakona i ako okrivljeni u roku koji je određen u prekršajnom nalogu ne prihvati odgovornost za prekršaj u skladu s odredbama člana 30. ovog Zakona ili ne zatraži odlučivanje o predmetu pred sudom, smatrat će se da je okrivljeni prihvatio odgovornost propuštanjem, i prekršajni nalog postat će konačan i izvršan.

(2) Kada je novčana kazna određena zbog propuštanja u skladu s ovim članom, ovlašteni organ koji je izdao prekršajni nalog odredit će dodatnu taksu za naplatu u iznosu od 20,00 KM.

(3) U slučaju kada je prekršajni nalog uručen u skladu s članom 29. stav (2) tačka c) ovog Zakona, ovlašteni organ obavijestit će vlasnika vozila ličnim uručenjem ili poštom da takav prekršajni nalog postaje konačan i izvršan u roku od 10 dana od datuma obavještanja.

Član 32.

(Postupak po zahtjevu za odlučivanje pred sudom)

(1) Okrivljeni koji primi prekršajni nalog i želi da se o predmetu odluči pred sudom mora da:

a) zatraži sudsko odlučivanje tako što će na odgovarajućem mjestu potpisati jednu kopiju prekršajnog naloga i dostaviti je sudu u roku određenom u prekršajnom nalogu, i

b) se pojavi pred sudom na dan i u vrijeme određeno za usmeni pretres po prekršajnom nalogu, ili, ako datum nije naveden, onda na dan koji je sud odredio za usmeni pretres.

(2) Ako okrivljeni zahtijeva sudsko odlučivanje, sankcije određene u prekršajnom nalogu smatrat će se ništavnim. Sud može izreći bilo koju sankciju koju zakon dozvoljava, uključujući i strožiju sankciju.

Član 33.

(Lica koja nemaju prebivalište u Bosni i Hercegovini)

Okrivljenom koji nema prebivalište u Bosni i Hercegovini, a koji primi prekršajni nalog, može se ponuditi mogućnost da plati novčanu kaznu u najbližoj policijskoj stanici ili u kancelariji ovlaštenog organa. Ukoliko okrivljeni ne plati novčanu kaznu, smatrat će se da je podnio zahtjev za sudsko rješavanje i tada predstavnik ovlaštenog organa može odmah izvesti okrivljenog pred nadležni sud. Ukoliko nije moguće okrivljenog odmah izvesti pred sud, tada predstavnik ovlaštenog organa može preduzeti one radnje kojima bi se osiguralo njegovo pojavljivanje, u skladu s članom 6. ovog Zakona.

V. ZAHTJEV ZA POKRETANJE PREKRŠAJNOG POSTUPKA

Član 34.

(Podnošenje zahtjeva za pokretanje prekršajnog postupka)

U slučajevima kada nije moguće izdati prekršajni nalog, ovlašteni organ može pokrenuti prekršajni postupak protiv okrivljenog podnošenjem zahtjeva za pokretanje prekršajnog postupka nadležnom sudu.

Član 35.

(Sadržaj zahtjeva za pokretanje prekršajnog postupka)

(1) Zahtjev za pokretanje prekršajnog postupka treba biti na standardnom obrascu koji propisuje ministar pravde Bosne i Hercegovine i sadrži sljedeće podatke:

a) naziv ovlaštenog organa koji podnosi zahtjev;

b) prekršaj koji se okrivljenom stavlja na teret i naziv i član propisa koji propisuje prekršaj;

c) kada je okrivljeni fizičko lice - ime i prezime, i ukoliko je poznata, stalnu adresu, jedinstveni matični broj, kao i mjesto zaposlenja, a za strance i broj pasoša;

d) kada je okrivljeni pravno lice - naziv i sjedište, kao i jedinstveni identifikacioni broj;

e) činjenični opis radnji koji određuje pravnu kvalifikaciju prekršaja, mjesto, datum i vrijeme počinjenja prekršaja i druge okolnosti neophodne za određivanje prekršaja;

f) procijenjenu visinu naknade štete i druge troškove;

g) prijedlog dokaza koji treba da se izvedu; i

h) potpis ovlaštenog prestavnika ovlaštenog organa.

(2) Podnosilac zahtjeva jednu kopiju zahtjeva dostavlja sudu, a drugu kopiju dostavlja okrivljenom, lično ili poštom.

(3) Podnosilac zahtjeva može odustati od zahtjeva za pokretanje prekršajnog postupka sve do donošenja rješenja o prekršaju.

(4) Ako je zahtjev nerazumljiv ili ne sadrži sve što je potrebno da bi se po njemu moglo postupiti, sud će pozvati podnosioca da u određenom roku, a najkasnije u roku od osam dana, ispravi, odnosno dopuni zahtjev, a ako to ne učini, zahtjev će biti odbačen. U pozivu za ispravku, odnosno dopunu podneska podnosilac će se upozoriti na posljedice propuštanja.

Član 36.

(Sporazum o sankciji)

(1) Ovlašteni organ uz zahtjev za pokretanje prekršajnog postupka može priložiti ponudu okrivljenom da prihvati predloženu sankciju, koja može biti novčana kazna i/ili predložene zaštitne mjere. Ako okrivljeni prihvati predloženu sankciju ili ako se ovlašteni organ i okrivljeni sporazumiju o drugoj sankciji prije donošenja odluke o prekršaju, ovlašteni organ podnijet će sudu na odobrenje pisani sporazum koji sadrži detalje o sankciji, potpisan od okrivljenog i ovlaštenog predstavnika ovlaštenog organa. U opravdanim slučajevima sporazumom o sankciji može se predvidjeti i plaćanje novčane kazne u ratama u roku do šest mjeseci. Sud će odobriti sporazum između okrivljenog i ovlaštenog organa, ako utvrdi da on ispunjava zakonske uvjete.

(2) Za sve što nije regulirano ovim članom, analogno se primjenjuju odredbe člana 231. Zakona o krivičnom postupku.

(3) Sporazum o sankciji koji sud odobri može izvršiti ovlašteni organ u skladu s odredbama Poglavlja VII. ovog Zakona.

VI. EVIDENCIJA I BRISANJE SANKCIJA

Član 37.

(Vođenje evidencije)

(1) Sud koji donosi rješenje o prekršaju i ovlašteni organ koji izda prekršajni nalog će bez odgađanja u elektronskoj formi unijeti u prekršajnu evidenciju podatke o sankcijama koje su izrečene fizičkom, pravnom i odgovornom licu.

(2) Sud koji primi zahtjev za sudsko odlučivanje će, u skladu s članom 31. ovog Zakona, taj podatak bez odgađanja u elektronskoj formi unijeti u prekršajnu evidenciju i brisati sankcije izrečene odnosnim prekršajnim nalogom.

(3) Novčana kazna neće se brisati iz prekršajne evidencije dok se vodi kao dug u Registru novčanih kazni, u skladu s članom 39. ovog Zakona. Zaštitne mjere neće se brisati iz prekršajne evidencije dok se ne izvrše ili dok ne istekne rok zastarijevanja.

(4) Posebnim zakonom mogu se propisati duži rokovi za brisanje sankcija iz prekršajne evidencije.

(5) Pravilnik o sadržaju i načinu vođenja prekršajne evidencije donosi ministar pravde Bosne i Hercegovine.

Član 38.

(Brisanje sankcija)

(1) Kažnjavanje pravnog lica, fizičkog lica i odgovornog lica novčanom kaznom briše se iz evidencije *ex lege* ako kažnjeno pravno lice, fizičko lice i odgovorno lice u roku od dvije godine od dana pravosnažnosti odluke kojom je izrečena kazna ne počinu novi prekršaj.

(2) Pravnom licu, fizičkom licu i odgovornom licu koje je više puta bilo kažnjeno za prekršaj brisat će se ranije kazne ako u roku od dvije godine od dana pravosnažnosti odluke kojom je izrečena posljednja kazna ne počinu novi prekršaj.

Član 39.

(Davanje podataka iz evidencije)

(1) Podaci iz evidencije za kažnjena lica mogu se dati samo ako za to postoje opravdani razlozi.

(2) Podaci iz evidencije za kažnjena lica mogu se dati samo drugom sudu, nadležnom tužilaštvu, organima unutrašnjih poslova i organima inspekcije, u vezi s krivičnim postupkom ili postupkom za prekršaj koji se vodi protiv lica koje je ranije bilo kažnjavano za prekršaj, organima nadležnim za izvršenje sankcija za prekršaje ili nadležnim organima koji učestvuju u postupku brisanja kazne.

(3) Na obrazložen zahtjev nadležnog organa vlasti ili lica mogu se dati podaci iz evidencije za kažnjeno lice ako još traju određene pravne posljedice kazne ili zaštitne mjere ili ako za to postoji opravdan interes zasnovan na zakonu.

(4) Ako je odluka o kazni brisana, podaci o toj odluci nikom se ne daju osim sudu, nadležnom tužilaštvu u vezi s postupkom za prekršaj koji se vodi protiv lica čija je odluka brisana.

(5) Niko nema pravo tražiti od građana da podnesu dokaze o svojoj osuđivanosti ili neosuđivanosti za prekršaje.

(6) Građanima se na njihov zahtjev mogu davati podaci o njihovom kažnjavanju ili nekažnjavanju za prekršaje.

VII. IZVRŠENJE KAZNI

Član 40.

(Unos podataka o kaznama u Registar novčanih kazni)

(1) Sve novčane kazne i troškovi postupka koji su izrečeni na osnovu konačnog i izvršnog prekršajnog naloga ili pravosnažnog i izvršnog rješenja o prekršaju bit će upisani u Registar novčanih kazni i evidentirani kao dug koji kažnjeni duuguje odgovarajućem nivou vlasti kome se kazna plaća.

(2) Novčane kazne i troškovi postupka evidentiraju se kao dug u Registru novčanih kazni dok kažnjeni ne plati puni iznos novčane kazne i troškova postupka. Novčana kazna i troškovi postupka će u svakom slučaju biti brisani iz Registra novčanih kazni nakon proteka pet godina od dana kada su prekršajni nalog ili rješenje o prekršaju postali konačni i izvršni.

Član 41.

(Posljedice upisa kazne u Registar novčanih kazni)

(1) Dok se ne plate sve novčane kazne i troškovi koji su evidentirani u Registru novčanih kazni, kažnjenom se neće dozvoliti:

- a) registracija ili produženje važenja registracije motornog vozila;
- b) izdavanje ili produženje važenja vozačke dozvole;
- c) učešće na javnom tenderu; ili
- d) promjena registracije pravnog lica ili registracije samostalne zanatske djelatnosti.

Član 42.

(Izvršenje prekršajnih sankcija i postupak prinudne naplate)

(1) Svaki ovlašteni organ odgovoran je za praćenje izvršenja novčanih kazni i drugih mjera izrečenih prekršajnim nalogom ili putem sporazuma o sankciji.

(2) Sudovi će pratiti izvršenje novčanih kazni i drugih mjera izrečenih rješenjem o prekršaju.

(3) Ako pravno lice prestane postojati nakon pravosnažnosti odluke o prekršaju, prekršajne sankcije izvršit će se u odnosu na pravnog sljednika. O izvršenju prekršajne sankcije protiv pravnog sljednika sud će donijeti posebno rješenje protiv kojeg je dozvoljena žalba. Uložena žalba odgađa izvršenje rješenja

(4) Ako se utvrdi da kažnjeni izbjegava platiti novčanu kaznu, ovlašteni organ ili sud mogu zatražiti od Poreske uprave Federacije Bosne i Hercegovine, Republike Srpske ili Brčko Distrikta Bosne i Hercegovine da primijeni postupak prinudne naplate koji je određen u odgovarajućem zakonu o poreskim upravama za bilo koji iznos evidentiran u Registru novčanih kazni, na isti način na koji je ovlaštena za naplatu poreskih obaveza. Poreska uprava može provesti takav postupak prinudne naplate bez potrebe da kažnjenom uruči nalog za plaćanje.

(5) Ako je novčana kazna izrečena pravnom licu ili ako se utvrdi da je to efikasan način osiguranja naplate, sud koji je izrekao novčanu kaznu provest će direktno prinudnu naplatu blokiranjem računa pravnog lica u skladu s odredbama Zakona o izvršnom postupku.

(6) Ako se utvrdi da za prekršaj indirektnih poreza kažnjeni izbjegava da plati novčanu kaznu ili mjeru naplate protuvrijednosti robe izrečene rješenjem suda, sud će od Uprave za indirektno oporezivanje zatražiti da provede postupak prinudne naplate po Zakonu o postupku prinudne naplate indirektnih poreza ("Službeni glasnik BiH", br. 89/05 i 62/11)."

Član 43.

(Lišavanje slobode zbog neplaćanja)

(1) Kažnjeni koji u roku ne plati u potpunosti ili djelimično novčanu kaznu koja mu je određena rješenjem o prekršaju ili prekršajnim nalogom bit će prinuđen na plaćanje određivanjem lišavanja slobode, ako sud smatra da je to jedini razuman i efikasan način koji će primorati kažnjenog da plati iznos na koji je obavezan. O lišavanju slobode zbog neplaćanja sud odlučuje rješenjem koje se protiv kažnjenog može donijeti samo jedanput za odnosni prekršaj. Ovo lišavanje slobode može odrediti sud po službenoj dužnosti ili na prijedlog ovlaštenog organa ili poreske uprave (Federacije Bosne i Hercegovine, Republike Srpske ili Brčko Distrikta BiH). Sud će obavijestiti podnosioca prijedloga o svojoj odluci i o izvršenju lišavanja slobode.

(2) Sud može odrediti lišavanje slobode do 15 dana. Vrijeme za koje je kažnjeni lišen slobode neće uticati na plaćanje iznosa koji duguje. Kažnjeni će biti odmah oslobođen nakon plaćanja punog iznosa novčane kazne.

(3) Lišavanje slobode po odredbama ovog člana ne može biti određeno kažnjenom koji može dokazati da nije u mogućnosti platiti novčanu kaznu.

(4) Protiv rješenja o lišavanju slobode kažnjeni može uložiti žalbu drugostepenom sudu u roku od osam dana od dana prijema rješenja o lišavanju slobode. Prvostepeni sud dužan je žalbu dostaviti drugostepenom sudu u roku od tri dana od dana prijema žalbe. Drugostepeni sud mora donijeti odluku po žalbi u roku od 15 dana od dana prijema spisa. žalba odgađa izvršenje.

(5) Prije početka izvršenja rješenja o lišavanju slobode, kažnjeni može sudu predložiti da obavlja poslove za opće dobro ili poslove za dobro lokalne zajednice, kao zamjenu za plaćanje novčane kazne. Sud će voditi listu takvih poslova u saradnji s nadležnim kompetentnim organima vlasti. Prilikom odlučivanja o prijedlogu, sud će razmotriti sve okolnosti slučaja, kao i finansijske uvjete i mogućnost kažnjenog da plati novčanu kaznu.

(6) Ukoliko sud usvoji prijedlog iz stava (5) ovog člana, izdat će nalog za obustavu izvršenja lišavanja slobode za vrijeme dok ne istekne rok za obavljanje takvog posla. Ukoliko kažnjeni obavi predviđeni posao, lišavanje slobode neće se izvršiti i novčana kazna brisat će se iz Registra novčanih kazni i neće biti naplaćena. Ukoliko kažnjeni uopće ne obavi predviđeni posao, rješenje o lišavanju slobode bit će izvršeno, a ako ga obavi samo djelimično, sud će cijeniti da li je svrsishodno izvršiti lišavanje slobode i o tome donijeti odgovarajući nalog.

VIII. OSTALE ODREDBE

Član 44.

(Prihod budžeta Bosne i Hercegovine)

(1) Novčane kazne i sredstva pribavljena prodajom oduzetih predmeta za prekršaje koji su propisani zakonima i drugim propisima Bosne i Hercegovine, prihod su budžeta Bosne i Hercegovine, a novčane kazne i sredstva pribavljena prodajom oduzetih predmeta za prekršaje propisane zakonima entiteta Republike Srpske i Federacije Bosne i Hercegovine, Brčko Distrikta Bosne i Hercegovine, kantona u Federaciji Bosne i Hercegovine, gradova i općina, prihodi su budžeta navedenih nivoa vlasti.

(2) Izuzetno od stava (1) ovog člana, novčane kazne i sredstva pribavljena prodajom oduzetih predmeta kao i sredstva od naplate protuvrijednosti robe, za prekršaje iz oblasti indirektnih poreza koji su propisani zakonima i drugim propisima Bosne i Hercegovine, prihod su Jedinstvenog računa za koji je odgovorna Uprava za indirektno oporezivanje.

Član 45.

(Troškovi prekršajnog postupka)

Troškovi vođenja prekršajnog postupka prihod su budžeta iz kojeg se finansira ovlašteni organ koji je izdao konačan prekršajni nalog, odnosno sud koji je izdao pravosnažno rješenje.

Član 46.

(Posredovanje)

Sud može predložiti posredovanje preko posrednika, ako bi to bilo svrsishodno s obzirom na sadržaj imovinskopravnog zahtjeva oštećenog.

Član 47.

(Obaveza pružanja pravne pomoći i ostvarivanja službene saradnje u postupku izvršenja prekršajnih sankcija)

U postupku izvršenja sankcija, sudovi i ostali ovlašteni organi dužni su uzajamno pružati pravnu pomoć i ostvarivati službeni saradnju u skladu sa Zakonom o pravnoj pomoći i službenoj saradnji u krivičnim stvarima između Federacije Bosne i Hercegovine, Republike Srpske i Brčko Distrikta Bosne i Hercegovine ("Službeni glasnik BiH", br.19/02), i s propisima koji reguliraju izvršenje prekršajnih sankcija.

IX. PRIJELAZNE I ZAVRŠNE ODREDBE

Član 48.

(Prestanak važenja ranijeg zakona)

Početak primjene ovog Zakona prestaje važiti Zakon o prekršajima Bosne i Hercegovine ("Službeni glasnik BiH", br. 20/04).

Član 49.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH", a primjenjivat će se od dana početka primjene entitetskih zakona o prekršajima.